

日下舊聞考

四三

欽定日下舊聞考卷一百三十六



京畿

昌平州三

臣

等謹按昌平州之天壽山明代十三陵皆在其

地

本朝順治四年夏四月

世祖章皇帝特命工部修葺九年

敕禁明陵樵採十六年十一月十四日

世祖駕幸明陵十七日致祭明諸陵及明愍帝陵並

御製祭文又

命閣臣金之俊撰思陵碑記十二月復頒

諭修明崇禎帝陵詔並

命設立陵戶給與贍田俾司香火

聖祖仁皇帝亦嘗

親臨致奠飭令地方官加意防護乾隆五十年我

皇上行幸湯山取道昌平

躬詣長陵見諸陵寢明樓享殿多有傾圮卽神牌龕案

亦或遺失無存

奠醑之餘

睿懷軫惻特發帑金揀派大臣董率修理閱三年而工竣

皇上復親臨閱視殿宇煥然松楸如舊

闔澤深仁其布濩於前代者可謂洞寰洽宙已臣等伏

讀

御製過清河望明陵諸體詩

天藻煌煌炳如星日凡有明一代君德之賢否時政之得失上下三百餘年悉綜貫昭著於數千字之中

既咸欽

優渥之鴻施且共仰春秋之義法盛哉鑠乎度越千古  
矣茲謹將朱彝尊所引原書各條另編爲帙而首

先恭載

世祖諭旨并

御製祭文我

皇上諭旨暨

御製諸什以紀

聖聖相承之盛德焉

增

世祖章皇帝諭工部敕

諭工部前代陵寢神靈所棲理應嚴爲防護朕巡幸畿輔道經昌平見明朝諸陵寢殿宇牆垣傾圯特甚近陵樹木多被砍伐向來守護未周殊不合理爾部卽將殘毀諸處盡行修葺見存樹木永禁樵採添設陵戶令其小心看守責令昌平道官不時嚴加巡察爾部仍酌量每年或一次或二次差官察問勿致疎虞特諭

增

世祖章皇帝祭明諸陵文  
維順治十六年歲次己亥

十一月戊午朔十有七日甲戌

皇帝致祭於明成祖皇帝仁宗皇帝宣宗皇帝英宗皇帝憲宗皇帝孝宗皇帝武宗皇帝世宗皇帝穆宗皇帝神宗皇帝光宗皇帝熹宗皇帝諸帝丕承鴻運撫有寰區莅政理民爲一代主朕巡幸畿輔道經昌平瞻陵寢之在茲景流風而興感特以牲帛醴齊庶品之儀用申祭享尙其歆格

**增**

世祖章皇帝祭明崇禎帝文 維順治十六年歲次己

亥十一月戊午朔十有七日甲戌

皇帝致祭於明莊烈愍皇帝曰維帝英姿莅政志切安  
民十有七年勵精靡懈詎意寇亂國亡身殉社稷向使  
時際承平足稱令主祇以襲敝政之餘逢陽九之運雖  
才具有爲而命移莫挽朕恒思及憫惜良深今因巡幸  
畿輔道經昌平陵寢在焉顧瞻增感特以牲帛醴齊庶  
品之儀用申祭享尙其歆格

**增**

世祖章皇帝諭修明崇禎帝陵詔 朕惟膺圖永祚統



金定目下書卷之二  
卷之三十一  
四

紹百王而創業宏模情殷勝國歷觀史冊興亡之迹考  
其治亂得失之由僉以政荒遂干天譴邦國旣隳士民  
罔懷維有明莊烈愍皇帝實治理之究圖惜贊襄之莫  
逮以致寇氛犯闕宗廟爲墟追念喪師非因失德朕每  
念及此未嘗不惻焉傷心也頃者兩幸昌平周視明代  
陵隧躬親盥奠俯仰徘徊以彼諸陵規制咸壯麗相因  
獨愍帝之陵荒涼庠隘典物未昭原彼當年孜孜求治  
宵旰不遑祇以有君無臣薄海鼎沸洎乎國步傾危身  
殉社稷揆之正終之例豈同亡國之君朕於憑弔之餘

撫往興悲不禁流涕因欲繕治陵寢丹聖几楹慰靈爽  
於九京彰異數於奕禩迺核少府金錢悉皆小民正供  
倘增工徒之費殊乖賦式之經然終不忍聽其闕畧用  
是布告方州開導悃忱交相輸助聿新礪甃以肅松楸  
爾等溯厥源流夙沐前朝之澤凡茲臣庶寧無故主之  
思矧愍帝之終異於往葉而勸忠之感當有同心或列  
籍薦紳或齒登編戶恩沾累世德滅高曾勿以革故爲  
嫌致歉事亡之誼各隨心力共佐經營在內所捐貯之  
工部各直省地方輸之有司彙解工部獨慮經費浩繁

紆以歲月計貲罔缺工役迺興繚以周垣崇其寢殿奢  
靡不尙雖少遜厥諸陵鳩庀獨新庶無曠乎儀制所在  
奉行毋滋擾害克成斯舉式副朕心

**增**乾隆五十年奉

上諭直隸昌平州爲前明陵寢之地本朝定鼎後我

世祖章皇帝卽命以帝禮改葬思陵並敕工部修葺諸  
陵

親臨奠醑並禁止樵採添設陵戶我

皇祖聖祖仁皇帝亦曾

親臨致奠並飭地方官加意防護所以加禮前代者最爲優渥朕此次行幸湯山取道昌平躬詣長陵致奠見諸陵寢明樓享殿多有損壞神牌龕案亦遺失無存爲之慨然弗忍視蓋由明代中葉以後國事廢弛全不以祖宗爲念於陵寢並未修葺至末年復經流寇擾亂亦無人守衛以致日就傾圮若其後代之君果能歲加繕治整齊完固逮今不過百有餘年亦何致頽剝若此又諸陵前雖建有碑座均未鐫泐未審彼時是何意見今親臨奠醊周覽之下深爲軫惻自應重加葺治增設龕

位俾臻完備再我朝開朔之初睿親王以我師克取遼東時明之君臣惑於形家謬說疑金代陵寢與本朝王氣相關將房山縣金陵拆毀是以爾時亦將定陵享殿撤去停其祭祀然明樓寶城仍存其舊未壞也維時我世祖尙未親政其事實由睿親王建議亦非

世祖意也今國家一統已歷百數十年勝朝陵寢自應一體修復所有定陵享殿著仍行修建春秋祀事如故又明世宗永陵前因尹嘉銓條奏將其祭祀裁撤但前明之亡不亡於崇禎而亡於萬歷天啓是以於歷代帝

王廟中撤其位祀而陵寢仍前致祭明世宗雖溺意齋醮尙不至如萬歷天啟之昏庸失德其陵寢自應照前一體致祭以昭大公我國家受

天眷命

世德顯承於前代陵寢繕完保護禮從其厚此次修復諸明陵殿宇等工卽費至百萬帑金亦所不靳所有此項工程著派尙書劉墉德保金簡侍郎曹文植德成董率經理務期完固工成後飭該地方官隨時稽察小心防護嚴禁樵蘇用副朕隆禮勝朝之至意欽此

增乾隆五十二年奉

上諭順治年間因明陵附近居民於陵旁樵採曾奉

諭旨禁止并添設陵戶看守數十年來地方官並未小心稽查以致殿宇損漏墻垣敲側之處甚多前年朕親臨奠醑緬懷前蹟是用惻然因特發帑金揀派大臣監督將各陵重加修葺茲屆工竣朕便道親臨閱視殿宇煥然松楸如舊第恐閱時既久地方官查禁不力復不免有私行樵採及殿宇牆垣間被風雨損壞等事嗣後應交直隸總督責成霸昌道就近專管稽查仍於每年

十月著工部屆期奏請派該部堂官一員前往查勘如有殿宇墻垣樹株傷損等事惟該管道員是問以示朕加禮勝朝保護舊陵至意著爲令欽此

增

御製過清河望明陵各題句

有序

六度南巡洪武必

瞻廟貌近茲北眺永樂一奠椒漿定鼎燕京排衆議而

具卓識

永樂十九年將遷都北京諸臣僉云不便主事蕭儀侍讀李時勉言尤峻切成祖怒殺儀下時

勉獄雖不無過當然以燕地負山帶海形勢雄偉臨中夏而控北荒誠所謂扼天下之吭而拊其背者金元俱建都於此比建康相去天淵成祖就封北平屢經出塞天險地利籌之已熟故卽位後決計遷都卓識獨斷誠



非近慮者所可及向批  
通鑑輯覽曾詳言之  
秘衣天壽示百載更有深謀卽

異代不能不爲護持故乙年是臨是興感慨飾新葺舊  
爰命水部之臣發價僱工不惜地官之帑逮去冬乃蒞  
事視季春以落成曰廢曰興都關法戒爲恩爲怨總拊  
虛無蓋自上澣迴鑾遇間每以成什逮茲避暑啟蹕竣  
詠遂以登篇憶前載度此橫杠哀明陵曾有長句值今  
日縱觀遠麓思殷鑒可無各題不拘一律而成近體或  
古風胥據真蹤卽倣昔巡書新帙 唐宗明祖弗相殊  
唐則失弦明有需事債率多咎齊泰

建文聽信齊泰黃  
子澄之言削藩鎮

以致召禍燕兵已次高資港方為割地之說實屬迂濶  
論者多右方孝孺而歸罪於齊泰黃子澄余以為債事  
之咎三人皆不能辭而其禍本禍根應識始三吾遷京  
則在太祖聽信劉三吾之言耳

違議辭江國卜鼎深謀近帝都此聯意已見前序宏制做成奉

天殿終於無用若為乎長陵享殿曰祓恩殿重檐九楹制極巍煥與彼奉天殿相倣為

自古帝王陵寢所無案明宣宗實錄載宣德嘗駐陵下  
語侍臣云皇祖嘗言帝王陵寢有崇奢麗及藏寶玉者  
皆無遠慮云云今長陵規制如此尙得謂之祛奢崇儉  
乎況為之子孫者又不能慎守神器旋至傾圮苟非我  
朝為之禁樵蘇重葺治終不免於殘壞可見徒崇奢麗之無益也

唐太宗明成祖皆

英雄也其處家門事大同而小異者蓋因唐高祖無能  
為建成元吉之禍又逼故太宗不得不倒行而逆施若

大正... 卷五... 七

明太祖乃有能爲者故成祖畏而弗敢卽動以待後日  
然使太祖弗聽劉三吾之言立成祖爲太子亦可無靖  
難之禍矣此蓋二帝之所遇不同有幸有不幸耳

右長陵

獻陵近在長陵右十二陵中儉約首

昌平十三陵內思陵原爲田貴

妃園寢本無明樓享殿此次修葺明陵始爲建置其明  
時所建者實止十二陵也日下舊聞載洪熙遺詔朕臨  
御日淺恩澤未洽於民不忍重勞山陵制度務  
從儉約云云故十二陵中獻陵規模最爲狹小朱氏之

君實巨擘惜乎一載位不久使其臨莅歷多年漢文宋

仁不足醜但盡子職不知他毓德者應爲法守然而其

時亦殆哉楊黃下獄因讒口

楊溥黃淮等同時輔太子監國永樂北征還太子遣

使迎稍遲帝怒入高煦譖悉徵東宮官屬  
下詔獄溥淮皆坐繫事見明史二人本傳  
是則立儲可

行哉計久長應酌臧否

右獻陵

長陵頌淳樸其言未必

允

長陵在明諸陵中規制最爲鉅麗則日下舊聞所載  
宣宗駐陵下語侍臣追頌成祖崇儉之言未足憑信

詳見前長陵詩注中

景陵實淳樸觀之美德蘊

自獻陵外惟景陵  
規制最小日下舊

聞載嘉靖十五年曾稍廓大之然則明諸陵  
中特爲淳樸想見始建時卽有崇儉之意

英祖有肖

孫儀刑服以近修政平強藩繩武業弗隕椽人俾通文

涓涓誠未謹

宣德元年開內書堂令劉柳爲修撰授小  
內使書內官始通文墨掌章奏與外廷往

來其後奄人柄政流毒  
無窮皆於此肇其端也

陳祚

郭循怒下獄則逞一時憤

殿壁繪幽風信知民務本不失爲賢君後世乖厥準

右景

陵 親征開曩聽權閹幸得還朝南內潛不以播遷咎

王振翻因復辟恨于謙 于謙當英宗北狩之後排羣議而力戰守不可謂無功宗社者

乃以立景泰恨之且信徐有貞石亨輩所嫉於復辟後文致其罪以謀逆律定讞實為冤獄 便些小

善何足紀從婦寺凶豈待占景帝易儲信貪位閱牆尺

布竟招嫌 按英宗信任王振致有土木之難幸而還

朝潛居南內繼因徐有貞石亨等徼倖奪門之功得以

復辟乃以私憾誅于謙翻憫惜王振之忠為之立祠褒

卹其好惡顛倒至此雖有釋建庶人之繫及罷宮妃殉

葬諸小善亦無足紀至若景泰自即位後即欲以已子

見濟代太子於是黃珖輩得窺其間遽然疏請遂以易儲貪天位而恣私欲終於殺禮西山景泰實有以自取然英宗亦豈得辭寡恩尺布之議哉向題景帝陵作曾

論及之

右裕陵

口宣經義具文徒

明史載帝於經筵畢必口宣賜酒饌劉定

之請以例賜毋煩玉音自是君臣間無一言相接夫當日經筵進講不過講官等擬撰講章臨朝宣讀一過并不若今之有親製御論闡發經義然卽此亦屬具文非如君臣日對疇咨國家實政者可比况并此循例數言亦請去之則一堂不啻千里之隔其時政務之叢脞更何待言耶向於通鑑輯覽中曾批論及此

劉定

之仍請弗須遂使情如千里隔相看默乃一言無雪冤幹蠱則誠善蠲賦省刑不可誣增厥乘時恣煬竈早成

家法與亡俱

憲宗增置西廠以太監汪直領之氣焰熾張羅織內外橫行無忌其後廠衛竊柄日

漸恣肆逮末世而元氣孱削遂以危亡蓋由永樂設立東廠寄宦官以訪緝之任早已作法於涼家法相承中

璫煬竈亦無足

怪耳 右茂陵

雖常有善政然亦任中涓

弘治在位十八年中

頗多善政然常令東廠廉刺外事其時上書言東廠當革者往往得罪未嘗不信任中涓也

積重原

難返去奢果是賢一倉萬石備實鮮

上博名傳

弘治時令天下

設預備倉每十里積粟萬石及數者為稱職過者旌擢不及者罰之原其意未始非備荒之一策然有萬不能行之勢以一縣地方縱橫百里而論綜計天下一千三百餘縣每十里萬石所積之粟不知凡幾安得有餘粟如此之多以供購糴且既視積數之多寡以定黜陟自必官為經理有司志在取盈則苛累橫征勢所不免即令如社倉之聽民輸納出入自司而其侵虧之弊又將不知若何昔朱子創立社倉亦止能行之一鄉一邑安

能例之天下况民生戶口日增而產穀之土有定購積  
既多價必日貴是預籌異日之民食有濟而先致現在  
之民食不敷矣余近作填倉日詩有譬如日三餐與二  
減其一曰留待汝饑誰肯信其議之句深見積貯一事  
言之易而行之實難弘治此舉  
亦可謂徒博虛名而鮮實惠耳  
享年祇廿六多忘無逸

篇 按明諸帝太祖成祖而外治績有可稱者仁宗宣  
宗孝宗而已然孝宗所處與仁宣異仁宣之際國勢初  
張綱紀修立二宗蒙業兢兢易稱令主至成化以後天  
下襲太平數十年矣晏安久則不期怠而自怠豐亨積  
則不期奢而自奢孝宗獨能恭儉有制勤政愛民庶幾  
知保泰持盈之道者獨不免信倚中官假之事柄東廠



之恣肇端於此涓涓不塞咎亦難辭然其施設未終年  
僅三十有六有足惜爾明自太祖成祖以來踐祚久而  
享年永者概不多見其自弘治以前如洪熙成化僅越  
四旬宣德正統甫踰三十其在弘治以後正德隆慶亦  
僅踰三十神宗雖逾五旬而怠荒失德所謂益之疾而  
厚其亡也至天啓弱冠而殂享年更促可見耽樂是從  
罔或克壽理誠不爽無逸之書以嚴恭寅畏爲祈天永  
命之本而以不知稼穡艱難不聞小人之依爲戒統觀  
有明諸帝年祚修短足爲明徵因論弘治之事附識之

並僂數以昭炯鑒云

右泰陵

連疏請誅闡驚泣忘食矣

尚可諉年少及壯益堪鄙惡事無弗爲實厭數

上聲僂指

莊宗李天下成帝張公子較彼尤甚焉不亡更何俟而  
竟未卽亡殊難究此理向著讀名誥約畧明其旨 前  
歲謁明陵而思及受命保命之要必當以敬爲本因著  
讀名誥一篇以爲天之視君猶父之視子父於子無不  
亟其愛子於父當無不亟其敬然及其一再失敬猶必  
訓誨之至怙終弗悛則亦弗愛之而已矣如明永樂之  
篡位大行誅戮應亡而弗亡正統之北狩應亡而亦弗

亡正德之荒淫失德應亡而尚弗亡此非慈父之道其  
 罪而仍有所顧惜之意乎必致萬歷怠政天啓童騃崇  
 頑有猜忌之失無恢復之能而後亡之天意昭昭可監  
 予嘗以為有明二百七十餘年傳世十六非昊蒼慈貺  
 不及此可不慎乎可不懼乎茲因望康陵題句有鑒於  
 難堪靡常之戒復申論之

右康陵

但知私孝忘公議璵

萼因開僥倖門既以修齋習黃老那更平聲戀世侈陵園

日下舊聞載永陵成世宗登陽翠嶺顧謂工部臣曰朕  
 陵如是止乎部臣倉皇對曰外尚有周垣未作乃築垣  
 諸陵之所無等語世宗既耽心清靜方欲脫躡天位何  
 乃斤斤較身後以致比別陵侈麗過甚實不值一噓耳

去奸匪聽忠臣諫斥佞乃因方士言

嚴嵩竊權罔利以世宗果刑戮每激

怒戕害人以逞其奸楊繼盛劾嵩十大罪五奸疏入帝大怒下繼盛獄冤死其時論嵩者不一並置若罔聞後因方士藍道行詐爲乩仙語具言嵩父子奸狀帝心動乃罷嵩下世蕃詔獄嵩之奸邪罪雖自此而明要難語於瘳惡之正也

白兔仙桃誇上瑞較於漢武倍爲昏

嘉靖中方士陶仲文

段朝用等以神仙服食之說聳聽希榮實踵文成五利故智然漢武旣覺其詐卽能誅少翁樂大而世宗始終不悟甚且以幄後獲桃白兔生子詡爲上瑞告廟稱賀其崇信左道更在漢武之下

按嘉靖欲

推崇興獻本屬人子至情假令集議之初卽定爲本生尊以帝號使其報本之意旣申或可隱全大義乃一時廷臣紛紛聚訟必執漢議相持遂使張璁桂萼等阿諛

逢迎激成過舉予向作濮議辨以局外而觀局中爲之  
權衡斟酌期合夫天理人情之正俾萬世本支承統者  
有所折衷因題永陵復識如右

右永陵

隆慶堪稱明帝

良石星猶諫廢朝章語緣遏抑內臣故廷杖受譽非受  
殃 通鑑輯覽載隆慶二年給事中石星上疏言帝縱  
飲娛情聲色內臣福威自恣肆無忌憚帝大怒詔廷杖  
黜爲民其時監杖中官滕祥尤怒星予重杖絕而復甦  
云云明之秕政莫過廷杖一事穆宗尚稱令主乃因一  
時之怒循行弊例遂至奸璫逞其私憤流毒搢紳彼時

轉有以曾經廷杖爲榮者綱紀陵夷名實倒置如此國是尚可問乎本朝一洗勝國諸弊政從無廷杖言官之事足正吏習亦振朝綱宦寺煬竈更無所之施矣

右昭陵

明帝鮮善政然或一二有茲今論定陵乃無一可取

少時擅居正任爲弗可否長

上聲

懶見廷臣股肱隔元首

以私弗立儲爭產益可醜

福王常洵鄭貴妃所生當儲位未定時妃侍寵要帝至大

高元殿謁神設誓立常洵爲太子帝卽緘書玉合賜爲符契後以廷臣爭之彊太后堅持立長而妃又失歡乃仍立皇長子爲太子封常洵爲福王福王婚費至三十萬營洛陽邸第費亦至二十八萬廷臣請王之國者數十百奏皆不報復命給王莊田非四萬頃不可後因葉向高封還手勅不得已聽王之國猶賜莊田二萬頃中

州腴土不足取山東湖廣田益之王猶奏乞淮鹽數千引開市洛陽邊餉由此大絀本朝則不然凡皇子分封田產皆撥自內務府多不過十萬從不取之賢黨好黨戶部此誠良法美政萬世所應遵守勿失也

混致此誰之咎

漢唐末造皆有黨禍至明季而更烈自顧憲成高攀龍等倡修東林講學號召

生徒樹標立幟而黨援門戶之禍遂成其時不惟真小人揚其毒焰而偽君子且益撼其頽波士習敝而國運傾四十八年之間君臣否隔綱紀廢弛邪黨滋蔓不可振救誰執其咎耶論者謂明亡實由於神宗洵不誣也

蓋天厭明德縱之歷年久明亡定於斯戒萬世不朽

右定

陵

記稱國將亡則必有妖孽三案萃泰昌運實遭決

裂踐阼未及月紀年半載缺史贊潛德彰蓋勉爲之說

按挺擊紅丸移宮三案皆由於泰昌其是非本無難

論斷而發言盈廷以致釀成疑獄口舌之病卽爲妖孽  
信亡徵之先見者也至其嗣服當神宗綱紀隳壞之餘  
紀年雖幾半載卽位未及一月無政可稱其於挺擊聚  
訟時對廷臣委曲求全君臣父子間至以文僞調停則  
亦未能潛修默感信乎中外者史稱潛德久彰惜其措  
施未展亦止可曲爲之說如此

右慶陵

明之天啓秦二

世昏闇大都相同爾所以趙高及忠賢其用奸亦相比  
擬然二世猶稍自肆天啓諸事不由已俾之斧鑿恣兒  
戲乳母竟至戕妻子斯固可嗤亦可憐明祚安得不亡



矣劇斷金陵爲厭勝亦蓋由於奸宦耳睿王報德以直  
爲聞其明樓被焚毀卽今重修復舊觀以德弗以直尤  
美 明至神宗末年綱紀廢壞極矣重以天啓昏懦婦  
寺竊權濫賞淫刑忠良慘禍不可殫述最可鄙者當我  
朝克取遼東彼乃惑於形家之說疑房山金代諸陵與  
本朝王氣相關遂行拆毀斷斷地脉又建關廟於其地  
以爲厭勝實屬乖謬然其時天啓童騃國是久置不問  
殆亦魏忠賢輩猖狂恣肆任意妄行轉不必歸咎於天  
啓也迨我師入定燕京相傳睿親王以尼堪外蘭之覆

焚燬德陵明樓享殿夫修怨復仇臣子之通義在睿親  
王自當以直報怨非爲已甚佢今閱百數十年德怨久  
泯昨因修復明陵仍命將天啓德陵所有明樓殿廡一  
律興造俾還舊觀此則以德報怨尤爲自古所無非以  
睿親王爲爲之已甚而反其轍蓋在我寧失之過厚耳

右德陵

大厦支寧一木材苛爲明更濟多猜勤勞甚亦

徒虛耳社稷殉之誠壯哉就寢飾終經早備

崇禎旣殉社稷李自

成命以宮屏載出遷殯昌平州州之士民開田貴妃墓  
藁葬其中一切簡率我

世祖定鼎後命以禮改葬

卽田妃園寢建陵並

御製祭文

駕詣

昌平致祭議加謚莊烈帝典禮優厚度越千古起樓設

主更重培

順治年間改建思陵而一切明樓享殿之制未大備今重爲修葺悉如別陵並普立神牌

木主供奉以妥享祀焉

得非其手報從厚萬古皇清德量恢

按

崇禎承神熹之後大勢已傾淪胥莫挽卽位之初尚有志於明作有爲而燭理不明徒事苛察加以多疑偏執往往於瑣屑處推尋小過而巨惡轉任其朦混嘗謂其無恢復之能有猜忌之實非刻論也故在位十有七年憂勤惕厲無裨阽危有足惜者卒之身殉社稷愍烈可稱與自古亡國之君有間本朝得統正大光明取非其手旣爲雪恥復仇而飾終典禮疊從優厚復訪其後裔

至今世襲侯封春秋命其祀陵皆自古施仁勝國者所未之有也茲因睇望各陵各爲系什並尚論當年興廢之由亦以示萬世殷鑒云爾

右思陵

欽定日下舊聞考卷一百三十六

欽定日下舊聞考卷一百三十七

京畿

昌平  
州四

**增**永樂七年五月營山陵於昌平縣遂封其山爲天壽

山

明典  
彙

**增**成祖擇壽陵久不得吉壤七年仁孝皇后尚未葬禮

部尚書趙玗以江西術士廖均卿至昌平縣徧閱諸山

得縣東黃土山最吉上卽日臨視定議封爲天壽山命

武義伯王通董役授均卿官或曰定長陵者王府尹也

亡其名亦不知何許人

同上

增十三年九月昌平壽陵成

同

增二十二年十一月太宗葬長陵

同

增宣德五年乙未上奉皇太后率皇后謁長陵獻陵車

駕發京師三月壬寅駐蹕陵下謂侍臣曰皇祖嘗言古

帝王陵寢有崇奢麗及藏寶玉者皆無遠慮吾子孫宜

戒之不可蹈也此語朕記憶不忘今所建陵寢皆皇祖

當時規畫不敢有所增益戊申還京師

同

原燕山自西山迤邐東來至玉田縣西北延袤數百里  
直抵海岸

紀纂淵海

原燕山去神京百里而近國朝諸陵在焉更名天壽

翁文簡集

**原**永樂七年五月營壽陵於北京昌平縣東黃土山封

曰天壽山命武義伯王通督工 大政記

**原**居庸東折玉帶神嶺諸山若抱若拱八陵在焉 治

平畧

**原**文皇帝初卜陵衆議欲用檀柘寺基上獨銳意用黃

土山卽天壽山也 宙載

**原**寧陽人王賢少遇異人相之當官三品乃授以青囊

書遂精其術永樂七年成祖卜壽陵有司以賢應命于

昌平州東北十八里選得吉壤舊名東樅子山陵成封

曰天壽賢後累官至順天府尹 水東日記

**原**永樂七年仁孝皇后尙未葬成祖擇壽陵久未得吉

壤禮部尙書趙玠以江西術士廖均卿至昌平縣遍閱

諸山得縣東黃土山成祖卽日臨視封天壽山命武義

伯王通董役授均卿官 獻徵錄

**原**天壽山名始於成祖蓋嘗駐蹕于此飲酒是日適萬

壽之期羣臣上壽故名天壽今之傳譌者謂爲御體所

藏名天壽者非也 明世廟識餘錄

**原**天壽山陵擇地或云江西廖均卿或云山東王賢賢



字惟善中永樂辛卯鄉試以鄆陵訓導擢戶科給事中  
陞光祿寺少卿尋遷順天府尹實錄暨兗州府志皆未  
言其精青烏之術所聞異辭難以懸定也 兩京求舊

錄

**原**山陵入路第一層龍沙帶崖第二層白玉石坊在紅  
門之南嘉靖十九年建坊北石橋橋南二喬松北瞰流  
泉松柏左右列各六行第三層自坊內行松陰中三里  
許至紅門下馬步入門內左爲拂塵殿圍牆正殿二層  
羣室六十餘楹皇帝謁陵至此更衣左右槐樹正寢二  
毀羣圍房各五百餘間第四層至龍鳳門黃綠琉璃甃  
治門內外白玉石華表柱各二雕螭龍色如乾黃玉門  
內外石橋七座白玉石爲欄第五層至碑樓洪熙元年  
建碑高十丈許無字第六層至櫺星門門左右列雕龍  
白玉石柱石人石馬麒麟象虎駱駝犀牛獅子 燕都

遊覽志

**原**宣德十年四月修葺長陵獻陵始制石人石馬於御

道東西 明宣宗實錄

**原**長陵葬成祖體天宏道高明廣運聖武神功純仁至

孝文皇帝仁孝慈懿誠明莊獻配天齊聖文皇后徐氏  
外一十六妃謚葬不可考 嘉靖祀典

**曾**仁孝皇后徐氏中山王遼長女嘗採女憲女誠作內  
訓二十篇又類編古人嘉言善行作勸善書頒行天下  
永樂五年七月崩 明史

**原**長陵在天壽山中峰之下門三道東西二角門門內  
東神厨五間西神庫五間厨前有碑亭一座南向內有  
碑龍頭龜趺無字重門三道榜曰祿恩門東西二小角  
門門內有神帛爐東西各一其上爲享殿榜曰祿恩殿  
九間重簷中四柱飾以金蓮餘髹漆階三道中一道爲  
神路中平外城其平刻爲龍形東西二道皆城有白石  
欄三層東西皆有級執事所上也兩廡各十五間殿後  
爲門三道又進爲白石坊一座又進爲石臺其上爐一  
花瓶燭臺各二皆白石又前爲寶城城下有甬道內爲  
黃琉璃屏門一座旁有級分東西上折而南是爲明樓  
重簷四出陛前俯享殿後接寶城上有榜曰長陵中有  
大碑一字大徑尺以金填之碑用朱漆欄畫雲氣碑頭  
交龍方趺寶城周圍二里城之內下有水溝自殿門左

右緣以周垣屬之寶城舊有樹 昌平山水記

**原**長陵在龍鳳門正北十二里居中其地名山塲乃康

家莊也陵之左有元時康家墳存之春秋賜二祭陵規

制大於諸陵祔恩殿石欄三重唯此與定陵為然其餘

僅一重耳登寶城獨從中道一門入與他陵左右掖門

入者異碑濶四尺五寸厚二尺五寸他陵亦不及也

**燕都遊覽志**

**原**長陵門右別有具服殿五間東向有周垣垣南有白

石槽五方而長名曰雀池貯水以飲雀 昌平山水記

**原**宣德五年三月上駐蹕陵下謂侍臣曰皇祖嘗言古

帝王陵寢有崇奢麗及藏寶玉者皆無遠慮吾子孫宜

戒之不可蹈也今所建陵寢皆皇祖當時規畫不敢有

所增益 明宣宗實錄

**原**宣德十年十月巳西建長陵神功聖德碑 同上

**原**長陵碑正統初南城程南雲奉命書 明武宗實錄

**原**嘉靖十七年上閱長陵碑欲更成祖諡號命錢木加

碑上郭勛上疏以為宜盡舊舊字更書之可以垂永久

上不悅曰朕不忍琢傷舊號下禮部翰林院議部覆請

遵上諭如式刊製擇吉奉安詔可 明典彙

**原**萬歷三十二年雷震長陵碑上命重建於是大學士沈一貫上疏言世祖欲改刻成祖陵碑而未遑今雷神奮威乃天意示更新之象欲皇上繼成祖德乘此更立新碑此莫大之慶也上優旨先行噫上蒼示警于祖陵正宜君臣修省乃反以為瑞應形之章奏比王安石天變不足畏罪浮十倍矣 野獲編

**原**楊士奇陪祀長陵作 萬里蒼梧去不還官車千古闕橋山日華間映芙蓉殿雲氣深連虎豹關扶病此時瞻玉几傷心何處望龍顏遺臣泣盡餘年淚天上烏號不可攀 東里集

**原**李夢陽謁陵詩 本朝陵墓傍居庸聞說先皇駐六龍一自玉輿回朔漠遂令金殿鎖秋峯明禋衮職雖多預備物祠官豈盡供報祀獨知今上切每於霜露見愁容 空同集

**增**邊貢冬至長陵詩 中峯隱隱下朝陽復嶂層崖起曙光觀闕昭回森象魏山河表裏奠金湯陵門月映千年樹寢殿風飄五夜香長至祠臣竊供奉擬書雲物紀

靈祥 華泉集

原劉士驥長陵陪祀詩 赤縣歸真主青山鎖故宮玉

魚沉永夜石馬立西風霜露秋容肅椒蘭祀典崇明禋

鸞馭在濟濟駿奔同 蟋蟀軒草

原鄭善夫至日陪祀長陵作 長陵西接黃花鎮白雪

蒼巖夜色遙陰殿袞龍猶在目往時松柏已干霄總聞

一怒風塵起想見千官遷次朝悵極兩京興廢事小山

何意起漁樵 少谷集

原區大相供事長陵詩 文皇鼎成後此地葬衣冠日

月神宮闕山河帝寢安塞雲疑扈蹕關樹想回鑿寂寞

犁庭事深知創業難 弓劍思軒后山川會禹陵翠旗

何日返龍馭幾時升寢殿行春草幽宮寂夜燈萬年關

路北神武至今稱 海日集

原又雨中祀長陵東同事諸子詩 日雨祠官肅山園

禁漏稀雲輕沉蕙帳風細颯靈衣浙瀝松堦靜深沉燎

火微羣公攀望處入夜有龍歸 同上

原范景文詩 松風一道瀉哀湍碧瓦鱗鱗白石欄一  
自路荒清蹕後十年間殺老中官 冰餐堂集

原仁宗昭皇帝陵曰獻陵在長陵之右 燕都遊覽志

原獻陵葬仁宗敬天體道純誠至德宏文欽武章聖達

孝昭皇帝誠孝恭肅明德宏仁順天啓聖昭皇后張氏

其恭靖賢妃恭懿惠妃貞靜敬如俱葬金山外一妃諡

葬不可考 嘉靖祀典 誠孝皇后張氏永城人父獻以女貴追封彭城伯正

統七年崩合葬獻陵 明史 明典彙

原七妃三葬金山餘皆從葬 明典彙

原獻陵在天壽山西峯之下距長陵西少北一里自北

五空橋北三十餘步分西為獻陵神路至殿門可半里

有碑亭一座重簷四出陞內有碑龍頭龜趺無字亭南

有小橋門三道榜曰祓恩門無角門殿五間單簷柱皆

朱漆直椽階三道其平刻為雲花石欄一層東西有級

兩廡各五間餘如長陵殿有後門為短簷屬之垣垣有

門垣後有土山曰玉案山故闢神路於殿西玉案山之

右有小橋前數步又一小橋跨溝水溝水自陵東來過

橋下會於北五空橋山後橋三道皆一空又進為門三

道並如長陵而高廣殺之甬道平寶城小塚半填榜曰

大定日下書

獻陵餘並如長陵山之前門及殿山之後門及寶城各  
爲一周垣舊有樹 昌平山水記

十三陵制獻陵最樸景陵次之洪熙元年五月上疾  
大漸遺詔有曰朕臨御日淺恩澤未浹於民不忍重勞  
山陵制度務從儉約是日升遐皇太子卽皇帝位及營  
仁宗皇帝山陵上諭尙書蹇義夏元吉等曰國家以四  
海之富葬其親豈惜勞費然古之帝王皆從儉制孝子  
思保其親之體魄於久遠亦不欲厚葬秦漢之事足爲  
明鑒况皇考遺詔天下所共知今建山陵宜遵先志義  
等對曰聖見高遠發於孝思誠萬世之利於是命成山  
侯王通工部尙書黃福總其事其制度皆上所規畫也  
同上

楊士奇謁陵詩 去年侍從謁長陵此日重來慟倍  
增春柳春花渾似昔獻陵陵樹復層層 君恩追憶不  
勝哀老淚乾枯病骨摧陵下一來腸一斷餘生知復幾  
回來 東里集

宣宗章皇帝曰景陵在長陵之左 燕都遊覽志  
景陵葬宣宗憲天崇道英明神聖欽文昭武寬仁純

孝章皇帝孝恭懿憲慈仁莊烈齊天配聖章皇后孫氏  
而以恭讓誠順康穆靜慈皇后胡氏葬金山榮思賢妃  
亦葬金山外六妃諡葬不可考 嘉靖祀典

**增** 孝恭皇后孫氏鄒平人父忠任永城縣主簿天順六  
年崩合葬景陵 明史

**增** 恭讓皇后胡氏濟寧人宣宗卽位孫貴妃有寵后未  
有子又善病上表辭位正統七年崩葬金山 同上  
**原** 八如一葬金山餘皆從葬 明典彙

朱彝尊原按宣德十年三月庚子贈何氏爲貴妃

諡端靜趙氏爲賢妃諡純靜吳氏爲惠妃諡貞順

焦氏爲淑妃諡莊靜曹氏爲敬妃諡莊順徐氏爲

順妃諡貞惠袁氏爲麗妃諡恭定諸氏爲恭妃諡

貞靖李氏爲充妃諡恭順何氏爲成妃諡肅僖諡



冊有曰茲委身而蹈義隨龍馭以上賓宜薦徽稱

用彰節行是從葬者蓋有十妃祀典典彙皆誤也

**原**景陵在天壽山東峰之下距長陵東少北一里半自北五空橋南數步分東爲景陵神路至殿門三里碑亭門廡如獻陵殿五間重簷階三道其平刻爲龍形殿有後門不屬垣殿後門三道並如獻陵甬道平寶城長而狹榜曰景陵周垣如長陵寶城前存樹十五株冢上一株

昌平山水記

**原**嘉靖十五年四月上親詣景陵語郭勛等曰景陵規制獨小又多損壞其于宣宗皇帝功德之大殊爲弗稱當重建享殿增崇基構

明世宗實錄

**原**天壽七陵惟景陵規制獨小嘉靖十五年稍廓大之

今言

**原**許國謁景陵詩 宣宗黃屋闕青山十載雍熙想像

間睿藻向來金匱秘宸遊長罷玉泉閒蒼林迴合春流斷紫霧冥濛晝殿闕始信霸陵留儉德試看階玉點苔

斑 許文穆集

增景泰七年營壽陵八年上皇復位廢帝爲郕王薨於西宮諡曰戾毀所營壽陵以親王禮葬西山給武成中衛軍二百戶守護成化十一年敕有司繕陵寢祭饗視

諸陵 明史

原英宗睿皇帝曰裕陵在慶陵少西 燕都遊覽志

原裕陵葬英宗法天立道仁明誠敬昭文憲武至德廣

孝睿皇帝孝莊獻穆宏惠顯仁恭天欽聖睿皇后錢氏

孝肅貞順康懿光烈輔天成聖皇后周氏其靖莊安穆

宸妃莊僖端肅安妃端莊昭妃恭安和妃恭僖成妃榮

靖貞妃恭靖莊妃恭莊端惠德妃莊和安靖順妃昭肅

靖端賢妃端靖安和惠妃端靖安榮淑妃安和榮靖麗

妃昭靜恭妃僖洛充妃惠和麗妃端和懿妃俱葬金山

貞順懿恭惠妃葬桃山 嘉靖祀典

增孝莊皇后錢氏海州人正統七年立爲后無子周貴

妃有子立爲皇太子成化四年崩合葬裕陵異隧距英

宗元堂數丈許中室之虛右壙以待周太后其隧獨通

而奉先殿亦不設后主 明史

而奉先殿亦不設后主 明史

大正...

卷...

七

增孝肅周太后英宗妃憲宗生母也昌平人憲宗卽位尊爲皇太后弘治十七年崩合葬裕陵 同上

原山陵初止一后耐葬至英宗元配孝莊錢后終時憲宗厭于生母孝肅周后幾不得耐葬裕陵大臣力諍之

始虛孝肅元官以待而二后並耐自此始矣 野獲編

原十八妃一葬繇山餘俱金山 明典彙

原高廟文廟仁廟宣廟皆用人殉葬至英宗大漸名憲廟謂之曰用人殉葬吾不忍也此事宜自我止後世子孫勿復爲之至今遂爲定制 否泰錄

原天順八年六月裕陵成其制金井寶山城池一座照壁一座明樓花門樓各一座俱三間香殿一座五間雲龍五彩貼金硃紅油石碑一祭臺石一燒紙爐二神厨

正房五左右廂房六宰牲亭一牆門一奉祀房三門房三神路五百三十八丈七尺神宮監前堂五間穿堂三

間後堂五間左右廂房四座二十間周圍歇房並厨房八十六間樓一門房一大小牆門二十五小房八井一

神馬房馬房二十歇房九馬椿三十二大小牆門六白石橋三甃石橋二周圍包砌河岸溝渠三百八十八丈

二尺栽培松樹二千六百八十四株 明英宗實錄

**原**裕陵在石門山距獻陵西三里自獻陵碑亭前分西

為裕陵神路路有小石橋碑亭北有橋三道皆一空平

刻雲花殿無後門榜曰裕陵餘並如景陵寶城如獻陵

垣內及冢上樹存一百七十株 昌平山水記

**原**宋獻陪祀裕陵詩 龍荒六駕飛想像翠華歸廟社

靈無改天人理果微烝嘗欣永托禮樂正垂衣寢殿澄

氛霧觚稜漾素輝 昌平州志

**原**憲宗純皇帝陵曰茂陵在裕陵西北 燕都遊覽志

**原**茂陵葬憲宗繼天凝道誠明仁敬崇文肅武宏德聖

孝純皇帝孝貞莊懿恭靖仁慈欽天輔聖純皇后王氏

孝穆慈慧恭恪莊僖崇天承聖皇后紀氏孝惠康肅溫

仁懿順協天佑聖皇后邵氏而恭肅端順榮靖皇貴妃

亦葬天壽山端順賢妃恭惠和妃和惠靖妃莊靖順妃

端榮某妃莊懿德妃靖順惠妃昭順麗妃端僖安妃恭

懿敬如懷榮賢妃靖僖榮妃俱葬金山 嘉靖祀典

**原**孝貞皇后王氏上元人孝宗即位尊為皇太后武宗

即位尊為太皇太后正德十三年崩合葬茂陵 明史

孝穆紀太后賀縣人本蠻土官女成化十一年暴薨  
孝惠邵太后昌化人父林嘉靖元年崩 同上

孝穆皇后紀氏孝宗生母也初葬金山孝宗卽位遷  
合葬孝惠皇后邵氏與獻帝生母也初葬金山世宗卽

位遷合葬十四如一葬陵之西南餘俱葬金山廢后吳  
氏亦葬金山 明典彙

原憲宗初選吳氏旋廢則元配爲孝貞后王氏而孝宗  
生母爲孝穆后紀氏同耐茂陵蓋循用裕陵新例至嘉  
靖入纘則憲宗貴妃邵氏已稱壽安皇太后尋終耐葬  
金山後亦遷耐茂陵于是三后並耐又從此始 野獲

編

原茂陵在聚寶山距裕陵西一里自裕陵碑亭前分西  
爲茂陵神路路有石橋一空制如裕陵榜曰茂陵垣內  
外及冢上樹千餘株十二陵惟茂陵獨完它陵或僅存  
御榻茂陵則篋簾之屬獨有存者 昌平山水記

原程敏政望茂陵詩 茂陵宮殿鬱參差已近先皇發  
引時上界鸞聲應載道北山龍脈又分支遞遷九室藏  
新主會遣千官奉節祠慚愧十年叨講幄一言無補髮

如絲 篁墩集

**原**薛惠謁茂陵祀孝貞太后詩

一棗東朝養千秋不

復歸夜臺長寂寞月殿少光輝野露淒金盃山風動玉

衣茂陵多碧草春日自芳菲

西原集

**增**王鏊恭送孝穆皇太后祔葬茂陵詩

露宿千官繞

風悲萬木號配天同浩蕩啓聖亦劬勞紅日低黃屋青

山映白袍誰云金殿遠還接茂陵高

王文恪集

**原**孝宗敬皇帝陵曰泰陵在茂陵之西

燕都遊覽志

**原**泰陵葬孝宗建天明道誠純中正聖文神武至仁大

德敬皇帝孝康靖肅莊慈哲懿翊天贊聖敬皇后張氏

嘉靖祀典

**增**孝康張皇后興濟人父巒封昌國公嘉靖二十年崩

合葬泰陵 明史

**原**弘治十八年六月營泰陵于天壽山勅太監李興新

寧伯譚佑工部左侍郎李鏊提督發五軍等三營官軍

萬人供役 明武宗實錄

**原**初建泰陵都下盛傳其地有水吏部主事楊子器前

言其事時督工太監李興有殊寵勢焰薰灼遂下楊錦

衣獄莫敢救者適起復知縣邱泰莆田人到京上疏言子器此奏甚有益蓋泰陵有水通國皆云使此時不言萬一梓官葬後有言者欲開則洩氣不開則抱恨終天今視水有無此疑可釋尋遣司禮監太監蕭敬押楊往衆謂必遭興毒手及至興率奴客詈罵楊欲箠之蕭敬曰水之有無視之立見何必爾又顧興曰士大夫可殺不可辱也遂得免既回奏無水衆又謂楊必死事傳禁中太皇太后聞之曰無水則已何必罪之遂得還職

九朝野記

**補**泰陵金井內水孔如巨杯水仰歎不止楊名父親見之歸而疏諸朝請易地事下工部湯陰李司空鏐怒其多言害成功陰令人塞其孔以誹謗狂妄奏命錦衣官校押名父赴陵所驗看名父身親三木朝辭賦詩云禁鼓無聲曉色遲午門西畔立多時楚人抱璞云何泣杞國憂天竟是癡羣議已公須首實衆言不發但心知殷勤爲問山陵使誰與朝廷決大疑其志亦可憐矣孝廟聖體竟葬此中言之可爲寒心李司空居官風采凜凜晚年尤剛勁不阿獨此一事不慊人意 無川聞談

○秦陵在史家山距茂陵西少北二里自茂陵碑亭前分西爲秦陵神路路有石橋五空賢莊灰嶺二水逕焉碑亭北有橋三道皆一空制如茂陵榜曰秦陵垣內及冢上樹百餘株存御座御案御榻各一承塵皆五色花板多殘缺而茂陵秦陵獨完 昌平山水記

○何景明謁秦陵詩

世切如雲望天摧格帝功彌留

念諸將顧命托三公玉几星辰上元宮霜露中松楸慟哭地白日起悲風 大復集

○徐禎卿長陵西望秦陵詩

新宮猶靄靄白露已蒼

蒼詎識神靈遠徒悲劍舄藏陰風連大漠落日照漁陽稽首攀松柏雲天洒淚長 迪功集

○邊貢供事秦陵有述

像設徒虛備龍遊竟不還勳

華留率土精爽寄空山石錮金泉黜雲棲碧殿殷寢園如種竹應有淚成斑 華泉集

○又望陵詩

徙倚東峰下西陵望鬱然元宮深闕日

玉座迴浮烟風雨清明候乾坤正德年攀龍無處所空有淚潺湲 憶在先朝日曾沾侍從恩鸞輿歸寂寞鳳質儼生存夕日昏阡樹春風長澗蘩祠官如可乞長奉



泰陵園 同上

**原**顧璘詩 松柏西陵路 祠臣仗節來 衣冠瞻漢寢 弓

劍拜軒臺 細雨春山濕 明星曉殿開 年年揮淚地 不見

長蒼苔 息園集

**原**王謐望泰陵詩 寡味慚樗散 休明憶聖朝 風雲猶

鬱鬱 松柏自蕭蕭 弓劍仙原闕 謳歌帝德昭 放勳如可

作直欲贊神堯 彭衙集

**原**何瑋望泰陵作 泉扃一自掩 重關惆悵 龍髯不再

攀絳節 定應歸帝所 翠華無復到 塵寰亂峰殘 照元猿

哭 衰草寒烟石 獸閒載筆小 臣凝望久 玉樓瑤殿倚空

山 何文定集

**原**王衡詩 九原何處不蒼涼 弓劍橋山泣 孝皇警夜

燎光承委珮 當關午漏下 封章翠旗風 雨歸華表玉几

星辰照未央 干禩泰陵坏 土濕登臺北 望一沾裳

山集

**原**武宗毅皇帝陵 日康陵在泰陵正西 田大受謁康陵

記 康陵西去紅門三十里 十二陵中最僻遠者 陵背負

五峰 形如青茵 苔舊名蓮花山 灌莽陰森 望之不見土

石長松大者至數十圍 燕都遊覽志

**原**康陵葬武宗承天達道英肅睿哲昭德顯功宏文思  
孝毅皇帝孝靜莊惠安肅溫誠順天偕聖毅皇后夏氏

嘉靖祀典

**增**孝靜皇后夏氏上元人正德元年冊立爲皇后嘉靖  
十四年崩合葬康陵 明史

**原**二妃葬金山 明典彙

**原**康陵在金嶺山距秦陵西南二里自秦陵橋下分西  
南爲康陵神路山勢至此折而南故康陵東向路有石  
橋五空錐石口水逕焉又前有石橋三空制如秦陵榜  
日康陵明樓爲賊所焚垣內外樹二三百株 昌平山

水記

**原**馬汝驥望康陵詩 康陵接秦陵西極紫雲層暮倚

金門柏秋攀玉殿藤地靈原有待天壽豈無憑洒淚還

佳節龍髯不可升 西原集

**原**王健上陵詩 玉帛來天府衣冠去國門萬年周典

禮七葉漢陵園月擁元宮迴星依紫極尊翠華如在上

瞻切五雲屯 鶴泉集

大正日六卷四考 卷五七 二

原張孚敬康陵陪祀作 至日康陵上初封土未乾君

臣原一體瞻拜亦多官清路旌旗斷空山草木寒去年

當此日猶未返長安 羅峰集

原顧夢圭謁康陵詩 早霧籠山暝新松匝殿稠三邊

餘武烈八駿想神游花萼皇情遠衣冠歲事修傷心大

官酒猶得獻千秋 疣贅錄

原王世懋夜出康陵作 石瀨苦頻涉巖巒却屢登寒

星動飛澗斷樹出疎燈不辨元宮色猶瞻紫氣層行行

一回首寂寞問康陵 王奉常集

原世宗肅皇帝陵曰永陵在長陵東南享殿前後凡五

重牆內外皆植栝子松陵恩殿後之左有松卧而復起

西向三折而始上寶城頂有杏有桑 燕都遊覽志

原永陵葬世宗欽天履道英毅聖神宣文廣武洪仁大

孝肅皇帝孝潔恭懿慈睿安莊相天翊聖肅皇后陳氏

孝烈端順敏惠恭誠祇天衛聖皇后方氏孝恪淵純慈

懿贊天開聖恭順皇后杜氏 芹城小志

原孝潔皇后陳氏元城人嘉靖七年崩諡曰悼靈葬嶼

兒峪十五年改諡曰孝潔遷葬永陵 明史

增孝烈皇后方氏江陵人嘉靖二十六年崩預名葬地

曰永陵 同上

增孝恪杜太后穆宗生母嘉靖三十三年薨葬金山穆

宗立遷葬永陵 同上

原孝潔皇后陳氏初葬襖兒峪隆慶初遷合葬繼后方

氏葬金山孝恪皇后杜氏穆宗生母也初葬金山隆慶

初遷合葬二十六嬪惟五妃葬襖兒峪餘俱金山 明

典彙

原世宗元配爲孝潔后陳氏繼曰孝烈后方氏上以方

氏有定變衛護功其終也梓宮先入永陵元宮又特祧

仁宗以孝烈神主入太廟比穆宗登極遷孝潔梓宮與

孝烈並祔而上生母爲孝恪后杜氏亦遷祔焉永陵亦

有三后同穴一如茂陵故事矣 野獲編

原嘉靖十五年禮部諸臣上言帝后合葬諸妃陪葬古

今經常之制英宗皇帝遺詔皇妃他日宜合葬惠妃亦

當遷來以後諸妃次第祔葬聖訓具在今會典止載睿

皇后錢氏合葬裕陵諸妃竟無陪葬者茂陵亦無陪葬

莫考其故臣等竊以諸妃陪葬義則不當由隧宜于外

垣之內寶山城之外明樓之前左右相向以次而耐庶  
合禮制從之 嘉靖祀典

嘉靖十五年作壽陵君即位為禋禮也壽宮在十八  
道嶺 今言

補永陵成世宗登陽翠嶺顧謂工部臣曰朕陵如是止  
乎部臣倉皇對曰外尚有周垣未作乃築垣諸陵所無  
也後定陵效之 北游紀方

補永陵寶城八十一丈外加方牆圍護特異諸陵 朱

文懿奏議

原永陵在十八道嶺嘉靖十五年改名陽翠嶺距長陵  
東南三里自七空橋北百餘步分東為永陵神路長三  
里有石橋一空有碑亭一座如獻陵而崇鉅過之碑亭  
南有石橋三道皆一空門三道門內東神厨五間西神  
庫五間重門三道東西二小角門又進復有重門三道  
飾以石闌累級而上方至中墀殿七間兩廡各九間其  
平刻左龍右鳳石闌二層餘悉如長陵殿後有門兩旁  
有垣垣各有門明樓無甬道東西為白石門曲折而上  
樓之三面皆為城堞榜曰永陵享殿明樓皆以文石為

砌壯麗精緻長陵不及也寶城前東西垣各爲一門門外爲東西長街而設重垣于外垣凡二周皆屬之寶城其規制特大 昌平山水記

**原**公鼐謁永陵詩 帝座明江漢河清應聖人規模千古上制作百王新 弓劍瞻遺像風雲想舊臣 桃花流磧望長見永陵春 問次齋稿

**原**何喬遠謁永陵詩 嗣服推真主垂衣數中興龍飛三楚外鳳起五雲層英武天將縱聰明古未曾文思多自渙威惠乃無恒議禮臣工屈箴心聖哲能居深三殿秘坐致萬方澄龍首朱堂建具茨法駕登夜飛陳寶石青映壽宮燈名昔張祖達聲終顏駟騰私門哀卞璧萬姓泣橋陵甲楯神猶護松楸涕倍增中宵天仗外明月滿觚稜 鏡山集

**原**穆宗莊皇帝陵曰昭陵在定陵之南東向 燕都遊覽志

**原**昭陵葬穆宗契天隆道淵懿寬仁顯文光武純德宏孝莊皇帝孝懿貞惠順哲恭仁儷天襄聖莊皇后李氏孝安貞懿恭純温惠佐天宏聖皇后陳氏孝定貞純欽

仁端肅弼天祚聖皇后李氏 芹城小志

**增** 孝懿皇后李氏昌平人穆宗為裕王選為妃嘉靖三十七年薨葬金山神宗即位合葬昭陵 明史

**增** 孝安皇后陳氏通州人萬歷二十四年薨 同上

**原** 昭陵在大峪山距長陵西南四里自七空橋北二百許步分西為昭陵神路長四里路有石橋五空德勝口水逕焉又西有石橋一空陵東向碑亭西有橋三道皆一空餘如康陵榜曰昭陵明樓為賊所焚樹亡 昌平山水記

**原** 趙用賢陪祀昭陵紀事 瑤臺晴雪淨春空劍珮聲

沉苑路東霜露每煩憂聖主貂璫無復肅齋宮通原燎火分宵白拂樹霓旌映曉紅寂寞翠華唯望幸空餘金粟鳥呼風 松石齋集

**原** 黎邦琰昭陵詩 松楸鬱鬱鎖崔巍寂寞春山帳殿

開鸞輅恍從霄漢下龍宮深注夜濤回虛疑銀海羣鳧浴無復瑤池八駿來六載垂衣歌聖澤攀髯何限鼎湖哀 嶺南文獻

**原** 神宗顯皇帝陵曰定陵在康陵之南東向田大受謁

陵記曰踰椽子嶺北是爲定陵 燕都遊覽志

**原**定陵葬神宗範天合道哲肅敦簡光文章武安仁止

孝顯皇帝孝端貞恪莊惠仁明媿天毓聖顯皇后王氏

孝靖温懿敬讓貞慈皇后王氏 芹城小志

**補**銀錢山在昭陵之西去九龍池五里萬歷二十五年

三月敬妃李氏薨進封皇貴妃諡曰恭順榮莊端靖擇

地萬貴妃墳之右悼靈墳之左葬焉 山陵考

**原**神宗壽宮皆種枯子松 湧幢小品

**補**大峪山壽宮寶城左至龍山脚下澗溝計四十丈五

尺右至西井界域計四十丈五尺總計八十一丈 朱

文懿奏議

**原**定陵在大峪山距昭陵北一里自昭陵五空橋東二

百步分北爲定陵神路長三里路有石橋三空陵東向

碑亭東有橋三道皆一空制如永陵其不同者門內神

厨庫各三間兩廡各七間三重門旁各有牆牆有門不  
升降中門之級殿後有石闌一層而寶城從左右上榜  
日定陵殿廡門爲賊所焚樹亡 昌平山水記  
**原**葉向高謁定陵詩 康衢何處不歌謠五十年來荷



帝堯泰運正當熙洽會乾坤獨攬聖明朝風傳天語來  
三殿日麗宸章下九霄謾說深宮娛晚歲憂勤睿慮幾  
曾消一望陵京氣鬱葱蕭蕭松柏起悲風長留日月  
光天壤更借烟雲護寢宮彷彿翠華馳道裏淒涼清蹕  
夢魂中傷心最是攀髯日獨有微臣抱帝弓蒼霞草  
原朱國祚謁定陵有感述詩乞歸自放潞河船息偃  
江湖二十年往事句臚成夢寐重來弓劍莫攀緣要知  
孝爲慈闈盡誰道恩從貴戚偏猶憶南宮封事入聽言  
終似轉圓然介石齋集

原光宗貞皇帝陵曰慶陵在裕陵西南俗傳爲景泰窪  
是也先是景泰中建爲壽宮英宗復辟景皇帝遂葬西  
山之麓陵基遂虛光宗上賓旣速倉卒不能擇地乃用  
此爲陵芹城小志

原景皇帝臨御日自建壽陵尋毀之華泉集

原邊貢過壽陵故址詩王體今何所遺墟夕靄凝寶  
衣銷野燐碧瓦蔓溝藤成戾當年諡恭仁葬後稱千秋  
同一設不獨漢唐陵同上

原虞淳熙景泰窪詩合沓衆山轉鴻溝界危岡貞松

心不移偃蓋覆神堂欲蛻龍爲魚千古以慨慷土木骨  
縱橫魂來關塞長君王奠鰲足太史筮苞桑宗廟救淪  
喪朱火寒有光迎駕誼何篤覆轍戒難忘豈無延陵心  
重爲亡國傷官門一以奪羨門竟迷方碧瓦易黃屋蓬  
穎西山旁村宇啼舊埏織烏集野棠坤維幸弗絕一窪  
得新藏靈表扶九宮何必做陰房碧血障邊塵芊芊白  
草芳高睇歌大招涕泗洒衣裳 德園集

**原**慶陵葬光宗崇天契道英睿恭純憲文景武淵仁懿  
孝貞皇帝孝元昭懿哲惠莊仁合天弼聖貞皇后郭氏  
孝和恭獻溫穆徽慈皇后王氏孝純淵靜慈肅皇后劉  
氏 芹城小志

**原**諭禮部朕唯慶源有自禮必隆于所生孝思永言施  
必由于親始典闢教化義重彛倫章獻俱存肇稱宜亟  
我聖妣貞靜賢妃芬降華宗躬膺令德徽音夙稟于女  
史婉懿早著于青蒲在昔皇考毓我弟昆蓋華萼共輝  
于連枝而顧復各勤于離裏我皇兄纂承祧之重旣篤  
于濬源逮眇躬荷世及之休亦深于倦慕欲酌罔極宜  
備追崇正儷體之鴻稱舉遷祔之上典爾禮部其會官

詳議以聞于是尊諡聖母孝純淵靜慈肅毗天鍾聖皇  
后祔葬慶陵 明崇禎遺錄

**原**天啓元年禮部左侍郎署尚書事周道登疏言昭陵  
舊制稜恩殿正當龍砂之上形家謂龍砂不可損傷有  
謂獻陵享殿亦在龍砂之外今營建規制原仿昭陵而  
斟酌地勢兼參獻陵 明熹宗實錄

**原**陵寢有後殿中殿前殿重門相隔有爲門之樞紐者  
曰銅管扇治鑄甚艱舊例責內侍監造時因慶陵擇定  
九月初四日窳窳內侍以期太迫再四規避工部尙書  
劄臣萬燦董其事甫一月而功成 陵工記事

**原**慶陵在天壽山西峰之右距獻陵西北一里自裕陵  
神路小石橋下分東北爲慶陵神路長二十餘步有橋  
一道一空制如獻陵平刻龍鳳殿柱飾以金蓮殿無後  
門殿後繚以垣門一道門北有橋三道皆一空其水自  
殿西下殿門西又有一小橋爲行者所由殿北過橋有  
土岡自東而來至神路而止岡後周垣門三道如獻陵  
寶城東西直上至中復爲甬道而入榜曰慶陵殿門前  
及垣內樹五百株 昌平山水記

**原**朱國祚恭謁慶陵作 講幄頻趨鶴籞深重來就日  
慘棠陰十年始受東朝册一月真傾下土心視榷盡收  
中使節披沙罷採井人金最愁日歷書難旣龍去烏號  
涕不禁 枚卜纔宣三殿麻深宮遽晏五雲車翠微色  
映長陵樹金粟堆開景帝窪北去重關遮烏道西來一  
水抱龍沙白浮村下園官近未夏雕盤已薦瓜 介石  
齋集

**原**熹宗哲皇帝陵曰德陵在永陵之東北卽永陵之虎  
沙也陵獨西向與昭定二陵相對旁有竇禹錫手植槐

燕都遊覽志

**原**德陵葬熹宗達天闡道敦孝篤友章文襄武靖穆莊  
勤哲皇帝 芹城小志

**原**懿安皇后張氏性賢明魏璫誅僂朝士后聞楊左諸

君子死色不豫者累月李自成入犯思陵將殉社稷傳

旨後宮令自裁時周皇后及貴妃宮嬪之承寵者皆遵

旨畢命獨長公主年尙幼未奉詔帝怒拔刃斫其臂公

主仆地而宮監王永壽方從懿安皇后宮至白帝曰懿

安皇后業縊死宮中矣帝乃走煤山自經當魏忠賢柄

國時有養女任氏美而狡進之熹宗立為貴妃及賊入  
宮任偽曰我天啓皇帝后也賊不敢犯既而流轉民間  
或送于官永壽從旁竊窺之曰此任貴妃也貴妃睨永  
壽面發積旋閉目如不聞見者永壽終亦不敢置訐也  
永壽事熹宗不入魏黨甲申寇亂後削髮為僧往來西  
山間談及故宮事輒語人云 菊隱紀聞

**原**德陵在潭子峪距永陵東北一里自永陵碑亭前分  
北為德陵神路陵西南向碑亭前有橋三道皆一空制  
如景陵平刻龍鳳殿柱飾以金蓮殿無後門榜曰德陵  
殿樓門亭俱黃瓦 昌平山水記

**原**德陵葬雙鎖山潭子峪在永陵東北思陵葬錦屏山  
小紅門內 肅松錄

**原**吳惟英長陵道中望德陵詩 一望長陵路幾盤葱  
青秀色馬頭看烟嵐掩映依元隧松檜逶迤擁翠巒梧  
野乍含秋氣肅鼎湖遙帶夕陽寒神孫咫尺龍升處惆  
悵臨風淚不乾 墨讐齋集

**補**思陵既殉社稷至 本朝初諡曰懷宗端皇帝後乃更諡曰莊烈愍皇帝真

追隆勝國之盛典也 白頭閒話

道敏毅敦儉宏文襄武體仁致孝莊烈愍皇帝其神主則書懷宗欽天守道敏毅敦儉宏文襄武體仁致孝莊烈端皇帝神主之左爲周后主上書孝敬貞烈慈惠莊敏承天配聖端皇后右爲田妃主上書恭淑端慧靜懷皇貴妃主長俱不滿尺白櫝冒之 北游紀方

七年正月壬子葬皇貴妃田氏 國權

崇禎十五年七月皇貴妃田氏薨加諡册文曰桂殿承芳輝冠三星之首蘭宮隕秀禮崇六列之先惟昭德於生前宜隆恩於身後爾皇貴妃田氏生有令質早晉榮封麟趾鍾祥式振衍繩之慶雞鳴效警時襄宵旰之勤淑問方宣遺芳遽掩望帷如在悲空結于璠華辭輦猶聞名應高於彤管欲章懿範宜有褒旌爰稽素履諡爲恭淑端慧靜懷皇貴妃靈其有知尚歆寵渥 山書

鹿馬山有田貴妃墓南距西山口一里崇禎壬午妃薨葬此遣工部左侍郎陳必謙等營建未畢而都城失

守賊以帝后梓宮至昌平州士民率錢募夫葬之田妃墓內移田妃於右帝居中后居左以田妃之槨爲帝槨斬蓬藿而封之門外右爲司禮太監王承恩墓以從死耐焉 昌平山水記

順天府昌平州署吏目事省祭官趙一桂爲開壙捐葬崇禎先帝及周皇后共歸田妃寢陵事恭照明陵坐當昌平州天壽山卑職於崇禎十七年正署州捕遭際都城陷沒故主縊崩至三月二十五日順天府僞官李紙票爲開壙事仰昌平州官吏卽動官銀僱夫速開田妃壙安葬崇禎先帝及周皇后梓宮四月初三日發引初四日下葬母違時刻未便彼時州庫如洗監葬官禮部主事許作梅因葬主限迫亦再三躊躇卑職與好義之士孫繁祉白紳劉汝朴王政行等十人共捐錢三百四十千僱夫啟閉其壙中隧道長十三丈五尺濶一丈深三丈五尺督修四晝夜至初四日寅時始見壙宮石門用拐釘鑰匙推開頭層石門入內享殿三間陳設祭器中有石香案兩邊列五色綉緞侍從宮人生前所用器物衣服俱在大紅箱內盛貯中懸萬年燈二盞殿之

東間石寢牀一座鋪設絨氈上疊被褥龍枕等物又  
開二層石門入內適長大殿九間石牀長如前式高一  
尺五寸濶一丈田妃棺槨卽居其上初四日申時候故  
主靈到卽停於祭棚內陳猪羊金銀紙劄祭品同衆舉  
哀祭奠下葬畢職親領夫役入壙宮內卽將田妃移於  
石牀之右次將周后安於石牀之左後請崇禎先帝之  
棺居於正中田妃葬於無事之時棺槨俱備監葬官與  
畢職見故主有棺無槨遂將田妃之槨移而用之三棺  
之前各設香案祭器畢畢職親手將萬年燈點起遂將  
二座石門關閉當時掩土地平尙未立塚至初六日率  
捐葬鄉耆等祭奠號泣逾時方止畢職差人傳附近西  
山口地方撥夫百名各備掀掘筐擔昇土築完畢職同  
生員孫繁祉亦捐貲五兩買磚修築周圍塚牆高五尺  
有奇幸

大清定鼎特遣工部復將崇禎先帝陵寢修建香殿三  
間羣牆一週使故主不致淪沒於荒郊君后猶享血食  
於後世雖三代開國不逾是也計開劉汝朴錢六十千  
王汝朴錢五十千白紳錢三十千徐魁錢三十千李某



錢定曰：舊聞未。卷三十一  
某錢五十千鄧科錢五十千趙永健錢二十千劉應元  
錢二十千楊道錢二十千王政行錢二十千 肅松錄

朱彛尊原按思陵葬日仁和龔光祿佳育流寓昌  
平地官例書某帝之陵合以石板奉安梓官之前  
時倉卒不及礮石以甌代之鈐之以鐵乃光祿所  
書也光祿嘗爲予言壙始開入石門地甚濕其中  
衣被等物多黧黑被止一面是錦繡餘皆以布長  
明燈油僅二三寸缸底皆水其金銀器皆以鉛銅  
充之當時中官破昌良可憾也

原甲申四月密雲副將張減率所部兵至昌平城下繫  
血書於矢射城中於是生員孫繁祉同鄉官王廷授舉

人楊春茂監生白紳生員楊應震毛應元鄉民白希顏等倡義滅於五月朔日攻城城中響應自卯至午與賊戰斬級百餘生擒賊一百二十名墜城死者無算奪騾馬六十匹隨於次日同赴長陵祭奠縛賊渠李道春周祥磔之以僞官劉愷澤等四人獻俘於崇禎皇帝陵墓之側亦磔之具文哭奠焉 肅松錄

**原**思陵碑亭南北四丈八尺東西如之宮門三距亭十一  
一步階三唯中門有棟宇廣二丈四尺修三丈饗殿距  
門十三步階三無臺殿三楹廣七丈二尺修四丈二尺  
內香案一青琉璃五器全設一神牌高三尺五寸石青  
地雕龍邊以金泥之道曰明欽天守道敏毅敦儉宏文  
襄武體仁致孝莊烈愍皇帝中楹為煖閣長榻六扇中  
供木主三中則莊烈愍皇帝左則周后右則田妃外俱  
用櫨冒之周后神主題曰明孝敬貞烈愍惠莊敏承天  
配聖端皇后田妃神主僅存恭懿二字餘被人磨去矣  
配殿三楹俱黑瓦殿前大杏樹一株靈寢門三距殿址  
四步穴牆為門中廣二丈四尺修一丈二尺旁則戶矣  
明樓距門十一步不起樓階四中開一門左右夾牕二

金石錄卷之二十一  
碑石廣一丈六尺修六尺雕龍方座高丈許題曰莊烈  
愍皇帝之陵石几距樓十步長五尺博二尺几前石器  
五俱高八尺方式雕龍中一方鼎與諸陵異皆列在地  
寶城距几甚近無城周迴用牆高六尺中以石灰起冢  
高四尺繚以短牆左松八株右松七株 同上

**增**大學士金之俊奉

敕建明思陵碑記 臣常觀古今治亂之蹟邦國興替

之由使後人得而考焉以爲法戒者其義莫詳於史大  
約國之興也創業開基之君莫不有應天順人之舉積  
功種德爲累葉之所憑藉其亡也必末年季世之主或  
天資刻薄殘民以逞或闇弱昏庸太阿旁落或甚而縱  
慾敗度滅裂綱常種種失德難以枚舉皆因自取滅亡  
之道卽國祚之修短不同而覆敗相尋異世一轍書曰  
與治同道罔不興與亂同事罔不亡非虛語也我  
皇上聰明睿智典學惟勤涵泳六經之暇尤研精史書  
舉前代之是非往事之成敗靡不溯源窮委一一究其  
指歸而於明朝興亡本末更瞭如指掌深晰崇禎帝之  
所以失天下者厥咎有在非末世亡國之君可同年而

語但當時既無實錄日後慮多傳疑每慮  
睿慮之憫惻於順治十四年二月內爰

諭工部立碑表章恭繹

天語一則曰明崇禎帝尙爲孜孜求治之主祇以任用  
非人卒致寇亂身殉社稷再則曰若不亟爲闡揚恐千  
載之下竟與失德亡國者同類並觀於戲

宸鑒及此不能不低徊歎息頌我

皇上明並日月發幽光于已沈德邁前王昭公平於隔  
代真前此紀載中未有之盛事也茲工部遵

諭確石旣成

皇上特命臣之後爲文以勒之碑臣係故明梟臣矢殉  
溝壑幸邁永清之會再續餘生旣捧

徽綸而感涕益警

專命而徬徨以謗陋昏耄如臣何能追闡遺徽仰副

皇上表章之盛心然不敢不就見聞所及謬述其槩以  
竊附史臣之職也按崇禎帝本以英敏之姿潛德藩邸  
繼膺大統當卽位之始正逆瑤煽亂之餘中外危疑獨  
能不動聲色剪除大憝如秋風振槁因目擊人心蠱壞

盡屬如醉如夢之流法紀廢弛釀成不痛不癢之習銳  
意更茲猛圖法祖恤民隱畏天災常蔬食布衣痛自貶  
損講幄之咨詢不輟平臺之召對屢勤一段宵旰靡寧  
想望太平之意誠有如此

上諭所云孜孜求治者假令當日有先憂後樂之臣同  
心一德匡濟時艱小康猶可坐致卽或中材之佐警戒  
綱繆尙得彌縫歲月其如偷安積玩貪黷成風下吏之  
精神專用以鑽營結納大僚之好尙惟在于位高多金  
以致民窮盜起然發難之初不過西陲一隅亦何難以  
國家全力制之而上下相蒙以賊爲諱歎聚之勢日熾  
月盛攻城掠邑有同破竹然後舉國張皇紛紛議選將  
議抽兵議加派議設總理總督重臣臨渴掘井毫無成  
算以言剿則挫衄屢聞以言撫則招徠無術至於驕兵  
悍將反借賊勢披猖爲護身符來不能禦去不肖追遂  
蔓延流毒秦楚豫巴蜀暨大江以北所在騷然而朝端  
之上方爭洛蜀之黨日構元黃之戰厝火怡堂獨以賊  
遺君父憂間有一二耿介特立之士以公忠體國爲心  
又往往不安於其位一時內外文武事權在握者無一

實心辦職之人矣致令仁明銳治之主不幸而丁中葉  
陵替之後起弊扶衰萬難措手兼之子然孤立於上四  
顧盈庭茫無可倚豈非天之所廢莫能興之而人謀不  
臧適任其咎者耶考史傳所載凡末季亡國之君覆車  
之轍崇禎帝並無一蹈焉乃身殉社稷不引天亡之言  
亦綦烈矣於戲傷哉有君無臣貽禍邦國若斯哉此明  
代之可爲痛哭流涕者也我

皇上深用惻隱而欲亟爲之闡揚是卽孔子當年作春  
秋之心褒貶出乎至公瑕瑜毋令相掩俾天下後世讀  
明史者咸知崇禎帝之失天下也非失德之故總由人  
臣謀國不忠所致庶使後之爲人臣者悚然知所戒而  
後之爲人君者亦知慎於用人也然則煌煌

睿諭明乎致治保邦勿玩小寇而弭寇必以安民爲本  
安民則又以知人爲本此非直昭一時之信史實著萬  
世之常經蓋永爲君臣之寶鏡云

**原**今昌平州故永安城也正統中調長獻景三陵衛於  
中東西三山口及東西二營地方駐劄以護陵寢及土  
木之難明年景泰元年於昌平縣之東八里築城徙衛

於內名曰永安三年并昌平縣徙焉今之東西二門及城中大橋故南門遺蹟也其後續設陵衛益多乃于城南復築一城連之今之南門是也乃去舊城南面磚石而合為一周十里二十四步州治在舊城內大街西先為順天府昌平縣正德元年南京吏部尚書林瀚言陵寢所在歲三大祭欽遣百官陪祀及帝后忌辰歲暮正旦並遣駙馬詣陵縣小民貧供億煩苦請改為州以密雲順義懷柔三縣隸之助其力役凡有科派差徭及養馬之類悉皆優免從之未幾復降為縣八年縣丞張懷復奏始定為州以三縣屬焉

昌平山水記

**原**昌平升為州議自林文安瀚始其戶部分司舊駐京歲一巡視而已正德中始開署昌平見文林記 國史

**原**嘉靖十六年三月上駐蹕沙河視文皇帝行宮遺址

禮部尚書嚴嵩因言沙河為車駕展視陵寢之路南北道里適均文皇肇建山陵即建行宮于茲正統時為水所壞今遺址尚存誠宜復修而不容緩者且居庸白羊近在西北若鼎建行宮于中環以城池設官戍守寧獨

車駕駐蹕爲便而封守慎固南護神京北衛陵寢東可  
以蔽密雲之衝西可以扼居庸之險聯絡控制居然增  
一北門重鎮矣上是其議命卽日興工 明世宗實錄  
**原**嘉靖十七年十一月勅兵部左侍郎樊繼祖沙河駐  
蹕之所宜有城池其往相度乃同巡撫戴金陸鈞巡按  
胡守中王應兵備副使潘鑑橫直量度通一千一百五  
十五丈八尺其城垣四面量度停中惟南北二門乃鑿  
與出入之處各開三門中門視左右爲大南北二樓比  
東西亦加偉其城外濬池約離城六丈五尺濶二丈深  
一丈以嘉靖十八年正月興工旣竣得旨城門南名扶  
京北名展恩東名鎮遠  
西名威漠 建築疏稿

**臣**等謹按昌平山水記北名展恩作展思

**增**鞏華城四門置戍守亦曰鞏華臺 方輿紀要

**原**隆慶六年薊遼總督侍郎劉應節順天巡撫都御史  
楊兆議於鞏華城外安濟橋至通州渡口止疏通一河  
長可一百四十五里以運諸陵官軍餉發軍卒三千人



治之水部備考

**原**萬歷元年二月命昌平兵備僉事張廷弼疏濬鞏華城外河聽民徙鞏華城居住以輸官地價建修城隍廟  
明神宗實錄

**原**戚元佐鞏華城卽事詩 鞏華晴散紫宸朝曉度春風威漠橋花映前茅仙蹕引日臨左纛玉驄驕山迴御氣雲中轉爐裊天香仗外飄六尙才人都後乘綵霞深處擁笙韶 青藜館集

**原**王維植鞏華城陟眺作 沙城粉堞喜初凭壯接神京亦股肱地湧雲霞圍御宿峯懸松柏認皇陵青青輦道春苔合宛宛靈山紫氣凝盡說經營勞睿思羣工莫自論微能 槐野集

**原**天壽山陵前有鳳凰山後有黃花鎮左有嶙山右有虎峪東西山口兩水會流於朝宗河文皇帝葬所曰康家莊是爲長陵次皇山距長陵一里有半是爲獻陵次黑山距獻陵三里是爲景陵次石門山距景陵六里是爲裕陵次寶山距裕陵二里是爲茂陵次史家山距茂陵二里是爲泰陵次金嶺山距泰陵三里是爲康陵次

陽翠嶺距康陵十六里是爲永陵次大峪山距昭陵一里是爲定陵次里是爲昭陵次亦名大峪山距昭陵一里是爲定陵次

**原**

自州西門而北六里至陵下有白石坊一座五架又

北有石橋三空又二里至大紅門門三道東西二角門門外東西各有碑刻曰官員人等至此下馬入門一里有碑亭重簷四出陛中有穹碑高三丈餘龍頭龜趺仁宗皇帝御製文也亭外四隅有石柱四俱刻交龍環之其東有行宮又前可二里爲櫺星門門三道俗名龍鳳門門之前有石人十二四勳臣四文臣四武臣石獸二十四四馬四麒麟四象四橐駝四獬豸四獅子各二立二蹲近者立遠者蹲石柱二刻雲氣並夾侍神路之旁迤邐而南以接乎碑亭碑文後書洪熙元年四月十七日孝子嗣皇帝某謹述蓋文成而碑未立宣德十年四月辛酉修長陵獻陵始置石人石馬等於御道東西十月巳酉建長陵神功聖德碑是時仁孝皇后之葬二十有三年太宗文皇帝之葬亦十有一年矣然而始立者重民力也櫺星門北一里半爲山坡坡西少南有舊行

宮土垣一周坡北一里有石橋五空又北二百步有大石橋七空大石橋東北一里許有新行宮宮有感恩殿宮東南有工部廠及內監公署大石橋正北二里有石橋五空又二里至長陵殿門神道自嘉靖十五年世宗謁陵始命以石甃自大紅門以內蒼松翠柏無慮數十萬株今盡矣 昌平山水記

**原**入紅門有殿曰時陟車駕更衣之所也神路中石獅子犀象駱駝麟馬各四石人十二擎天柱四望柱二碑亭一而九陵分道焉長陵當中正南嚮其左爲永陵景陵右爲茂陵裕陵獻陵昭陵惟康泰二陵稍遠可三十里 小草齋集

**原**出昌平州東門數里入伽藍口又三里爲永陵園園後曰蔣山山腹有神仙洞洞不甚深鐫字於旁曰蜿蜒龍脊山吞月磊砢雲根洞有天上懸一石如覆鐘狀山上有三清殿復行二里度一溪溪西有七鳳橋長陵神道東流之水經焉旁有井故地名玉井灣北有工部廠與龍王廟並廟碑三弘治嘉靖萬歷中太監王定張保山潘朝用所立廠碑二其一思陵命太監魏國徵掌昌

宣軍務勅諭其一翰林韓四維所爲記也定與保山朝  
用皆爲工部厥員命掌鎮兵則自國徵始繼之者王希  
忠申之秀也希忠後死亂軍中之秀見賊陷京城削髮  
去爲僧有司香太監貫宗云然又行里許爲德陵神宮  
監又半里許名東井相傳成祖入妃葬此少北渡一小  
石橋爲德陵陵西向面大溪過大石橋而西至永陵再  
西而北至景陵由長陵西下坡度石橋爲獻陵又度小  
石橋爲慶陵再度石橋二爲裕陵松左右成列再西見  
碑樓出松林中度一大石橋抵碑樓下則茂陵也松列  
樓外者存二十二株列樓以內至祿恩門者三十六株  
自祿恩門入難以數計矣由茂陵神馬厰神宮監而西  
三四里度一大石橋至泰陵度溪而南至康陵折而北  
爲錐石口自溪而東有斷橋循麓右轉復度溪水上一  
岡至定陵少南爲西井再南爲萬妃墳又南則昭陵東  
至思陵

肅松錄

增景泰元年正月命於天壽山之南築城周圍十二里  
以居長陵獻陵景陵二衛官軍明景皇帝實錄  
增正德間定長陵以下諸陵各設神宮監並衛及祠祭

原長陵有東西二井東井在德陵東西饅頭山之南西  
向西井在定陵西北東向並重門門三道殿三間兩廡  
各三間綠瓦周垣會典言長陵十六妃從葬位號不具  
其日井者蓋不隧道而直下也自英宗止宮人從葬於  
是如墓始名其在陵山內者昭陵之左九龍池南爲蘇  
山有萬貴妃之墓東向憲宗妃也又南爲銀錢山有鄭  
貴妃暨二李劉周四妃之墓南向神宗妃也又南爲嶼  
兒峪有四妃二太子墓中閭妃王妃左馬妃次左哀沖  
太子右楊妃次右莊敬太子世宗妃太子也又南爲悼  
陵東南向孝潔皇后陳氏初謚悼靈葬此後遷世廟永  
陵而其封兆尚存旁有沈文盧三妃之墓至今猶曰悼  
陵云東山口迤東有劉惠妃墓英宗妃也又東八里綿  
山有蘄獻王滕懷王墓仁宗子也凡陵及妃嬪諸王之  
葬及上所御殿其外垣皆塗以紅土 昌平山水記  
原長陵獻陵裕陵茂陵慶陵俱癸山丁向景陵永陵俱  
艮山坤向泰陵壬山丙向康陵辛山乙向昭陵乾山巽  
向定陵戌山辰向德陵甲山庚向思陵子山午向 肅

松錄

**原**明初有玉鶴十二從南方來飛集燕山識者謂北平當王蓋兆燕山十二陵也 菊隱紀聞

**原**景泰元年正月命于天壽山之南築城周圍十二里以居長陵獻陵景陵三衛官軍二年十月徙昌平縣治并儒學倉庫於新築土城之內 明景帝實錄

**原**景泰七年七月太常寺言天壽山祖宗三陵所在今又益以壽陵猶未列諸祀典請於每歲春祈秋報附祭天壽山神主于北嶽之壇牲牢不加而事體實宜從之 同上

**原**嘉靖庚戌寇長驅至天壽山總兵趙國忠列陣紅門前寇不敢入而去 明世廟識餘錄

**補**天壽諸陵相傳夜分時有神燈出宮娥引駕以行神宮監多望見之虞吏部淳熙詩云夜深遙接白雲平原上金燈夜夜明山鬼蘿衣挽秋駕青冥有路不教行蓋紀其事也 黃圖雜志

**原**十二陵各有宰牲亭祠祭署朝房神馬房果園神宮監又各有衛領左右中前後五千戶所主率領軍士防

護陵寢其公署皆在州城 昌平山水記

**原**方新神宮監作 神宮倚陵麓虛曠白天開翠嶺鈎

簾入晴雲遶檻來三關凌朔漠萬井俯燕臺行望靈旗

動依稀玉輦迴 定溪集

**補**長陵祠祭署建于神宮監之南中爲公座左右小房

前爲署門永樂七年建獻陵祠祭署建于宰牲亭左中

爲公座左右楹爲官舍前爲門洪熙元年建景陵祠祭

署建于宰牲亭右中爲公座後爲官舍前爲門宣德十

年建裕陵祠祭署建于宰牲亭左中爲公座左右楹爲

官舍前爲門天順八年建茂陵祠祭署建于宰牲亭左

制如裕陵成化二十三年建泰陵祠祭署建于宰牲亭

左制如裕陵弘治十八年建康陵祠祭署建于宰牲亭

左中爲公座後爲官舍前爲門正德十六年建永陵祠

祭署建于宰牲亭左制如康陵嘉靖十五年建定陵祠

祭署建于宰牲亭左制如昭陵萬歷十一年建慶陵祠

祭署建于本陵橋南向東制如定陵天啟元年建德陵

祠祭署建于宰牲亭左制如永陵崇禎元年建 太常

記

**補**嘉靖十七年二月上躬行春祭禮乃改陵殿曰祫恩殿門曰祫恩門 明山陵考

**補**樞星門北五空橋南山坡號蘆殿坡當時祭陵以蘆席作殿以息羣工執事者 北遊紀方

**原**長陵果園在神仙洞北獻陵園在州南門外少西景陵園在山北裕陵園在景陵園西茂陵園在大松園西

泰陵康陵園俱在大紅門永陵園在神仙洞前昭陵園在西山口定陵園在州西門外御路西慶陵園在白浮

村德陵園在州西門迤南 肅松錄

**原**長陵獻陵榛廠俱在渤海所景陵廠在葦村裕陵泰陵廠俱在懷柔縣茂陵永陵昭陵定陵廠俱在密雲縣

康陵廠在紅川柳溝慶陵廠在平谷縣德陵廠在薊州

盤山 同上

**原**康陵神宮監太監劉杲嘉靖元年六月奏請天壽山空地并九龍池菜園種蔬果以備四時供獻命戶部給之 明世宗實錄

**原**凡祭清明中元冬至以太牢國初遣太子親王其後遣大臣行禮 昌平山水記



金定上... 卷五十一  
原舊制以中元節祀陵往往遇雨河流汎漲每苦漂溺  
迨嘉靖十五年世宗始改定清明霜降二大祭著爲令  
然後人無阻溺之憂 燕都游覽志

原唐制二月八日及生日忌日公卿朝拜諸陵又有忌  
日行香於京城宮觀至宋猶有宮觀行香之禮漢唐以  
來諸帝升遐宮人無子者悉遣詣山陵朝夕具盥櫛治  
衾枕事死如生本朝國忌上陵及內殿有祭無行香官  
觀之禮諸陵唯中官洒掃不遣宮女皆前代所不及也

穀城山房筆塵

補謁陵各官類晚入昌平憩宿五更祭陵公署弗能盡  
容各以類假宿如兵部官則宿于衛所戶部宿于倉司  
給事中宿于劉蕢祠黌校則翰林寓宿之地與察院相  
鄰察院諸御史宿處也楊學士守吐暮抵昌平遂誤入  
察院因賦詩曰雙眼風沙百里程敝衣瘦馬到昌平欲  
尋顏水先生館誤入分司御史廳導引輿臺顏盡赤將  
迎豸繡眼偏青只愁太史明朝奏昨夜文星犯法星  
無用閒談

原魏學禮大祀山陵賦

萬歷庚辰歲皇帝將有事於

山陵宗伯以故事請曰展陵視寢永昭孝思每帝嗣統則斯禮稱焉主上光紹鴻極八載於茲矣爰修縉典仰答神靈帝其念哉帝曰俞是唯朕衷厥俟典禮卜日考儀則秩宗其視厥載往欽哉乃以季春十有二日聖駕夙蹕兩宮聖母暨中宮皇后及諸嬪妃咸輿以從再越日肇稱祀典長永昭獻景裕茂泰康九陵及章皇后景皇帝陵厥明上奉兩慈宮以旋后妃從詰朝而還宮禮也臣伏覩曠儀思揚洪美唯昔何承天有上陵篇未足以極其致乃造斯賦以仰頌萬一云爾其辭曰皇明開天垂禩萬葉誕此神聖茂隆昌業紹九帝以駿宏邁三代而光牒逮垂衣之八載將展視乎山陵思神靈之在天超埃盭而崇登峻皇隴之巍峙實玉體之是憑悵儀刑之莫覲抒遐思而靡勝於是命秩宗稽懿典詢太卜戒雲輦建行宮以待莅兮運嘉木以經營覆善土以清路兮望馳道之允平肅九門之環衛兮屬元侯之上卿拱淵穆之宸居兮夾萬雉之朱城乃吉日之旣屆兮鑿輿夙以啓行闢長安之左扉兮歷輔權與璣衡炳瑤暉於泰階兮睹斗緯之清明蔚戈鋌之先導兮振霞采之

幢旌錯五色以成章兮卷蜚颺而縱橫玉輅耀以融麗  
兮儼曲蓋之葱蒨識鹵簿之威儀兮陽羲升而霧散兩  
宮皇母暨厥后妃東華東安宛見翟輦彼羣姬之捧乘  
兮粲綵裾之菲菲紛翼侍之服御兮載暎藹而交輝從  
官前行居守趨送駕次鞏華翩躚翠鳳既侍膳於慈闈  
朝昌平之羣衆詔奉車使馭蹕兮屯六師之如雲虎旅  
集其警嚴兮刁斗遠其相聞厥明至於天壽兮翠華弭  
於感思唯詰旦以行祭兮詣長陵以停綏御青袍以對  
越兮燎芬芳以焮吹列鼎俎與簋豆兮獻桂酒以陳辭  
思雄武之御世兮極神謨之飛宕控九宇以張弛兮齊  
宏功於肇創都燕甸以撫夏兮掃沙漠之翠帳振長算  
以詔後兮鬯神明以開亮唯聖智之建始兮繫繁祉之  
錫貺祭竟徹牲百官既出更設酒脯內祀靜謐兩宮中  
宮拜起齋栗聿愛敬之威盡昭內外之若一唯永昭之  
二陵實肅莊之元殿爰自仁而率親亦如儀而躬薦獻  
景裕茂以及秦康章后景帝奕葉重光八陵迢遞親禋  
不遑乃遣官以代祀僉縟文之是詳覲聖制之有奕兮  
循宏鬯之褻章肆經緯乎天地兮亦符協乎陰陽式邁

發以還闕兮朝百辟于明堂衍宗祊於萬載今享血食  
以孔長纘祖德以恒思兮流祚慶於無疆荷天命之彌  
篤兮永丕式于四方 長林片葉

**原**石瑤天壽山詩 銀峯翠壁峙諸孫嶽勢雄開祖宅  
尊關塞正當山右臂風雷近接海西門龍過古澗多成  
雨虎撼長松半出根隱隱五陵佳氣在欲攀弓劍泣深

恩 熊峯集

**原**屠應峻朝陵詩 本朝宮寢居庸北百二山河枕上  
都隧道陰陰連大漠金輿寂寂闕蓬壺天留碣石爲華  
表水遶柔乾作鼎湖欲寫神功鐫嶧頌窮崕絕壁倚天

孤 蘭暉堂集

**原**嚴嵩聖駕朝陵歌 沙河土馬若雲屯萬姓環門識

至尊青天突起迎鑾殿此地今爲駐蹕村 鈴山堂集

**原**梁有譽謁陵眺望詩 清秋霜露肅祠官帝里山川

此鬱盤上谷風塵通大漠居庸紫翠落層巒七陵松掩

金鋪暝萬壑鐘流玉殿寒香霧濛濛候靈蹕星辰還仰

太微看 蘭汀存藁

**原**瑣天壽山凡十口自大紅門東三里曰中山口又東

次定日六書考

卷五十七

七

北六里曰東山口距州東門八里有樓南北二座三層  
又北而西十里曰老君堂口距景陵北二里又西十五  
里曰賢莊口距泰陵北五里又西三里曰灰嶺口又西  
南十二里曰錐石口距康陵東北二里三口並有垣有  
水門又南十二里曰鴈子口距康陵西北三里又西南  
三里曰德勝口距九龍池四里有垣有水門又東南十  
里曰西山口距悼陵南二里有小紅門距州西門八里  
又東二里曰榘子口距大紅門三里凡口皆有垣陵後  
通黃花城 昌平山水記

**補**明諸陵犯前代陵名者匪一太祖曰孝陵與後周武  
帝同也成祖曰長陵與漢高祖魏孝文帝同也仁宗曰  
獻陵與唐高祖金穆宗同也宣宗曰景陵與魏宣武帝  
唐憲宗金睿宗同也英宗曰裕陵與金顯宗同也憲宗  
曰茂陵與漢武帝同也孝宗曰泰陵與唐元宗金肅宗  
同也武宗曰康陵與漢平帝東漢殤帝後晉睿祖宋順  
祖南漢劉龔同也世宗曰永陵與南唐徐知誥蜀王建  
金世祖同也穆宗曰昭陵與後周明帝唐太宗南漢劉  
晟同也神宗曰定陵與孫吳景帝魏孝明帝後周宣帝

唐中宗宋翼祖金景祖同也光宗曰慶陵與唐元昭后  
後唐德祖後周世宗遼聖宗興宗道宗同也熹宗曰德  
陵與南漢劉隱金宣宗同也莊烈愍皇帝曰思陵與金  
熙宗同也又與獻帝曰顯陵與前涼張重華後晉高祖  
遼世宗義宗同也昔宋徽宗梓宮從北還宰臣上陵名  
曰永固王性之以犯後魏明帝後周文宣二后陵名高  
宗特下秘書省參考蓋陵名相犯前代固多不避然使  
不同舊稱亦存乎考禮之臣多學博識爾 裘杼樓叢

說

**原**陵故爲康家莊長陵之東百餘步有土一邱康老葬  
焉康老者明初以前人也文皇帝卜斯地作山陵曰安  
死者人之同情也命勿去 昌平山水記

**原**松園在昌平州東門外延袤里許皆松檜無一雜樹  
以備陵樹缺移栽也二百年來禁人樵採遂成大林

燕都游覽志

**原**無名氏詩

鬱鬱松干樹青青閱歲時人間不敢採

留作萬年枝

昌平舊志

**聞**蔣山後龍母莊東一里有竇禹錫植槐空腹中可設

案羅坐八人 翠微志

賈氏植槐在景陵瓜園中順治四年伐去燕都游覽

志謂在德陵旁者非也 北游紀方

附

世祖章皇帝御製明內監王承恩碑文 朕聞烈士

殉名齋志而歿貞臣衛主捐軀以從自有明失馭寇陷

都城懷宗皇帝敦國君死社稷之義崩於石室時有司

禮監秉筆太監王承恩者攀龍髯而矢志甘雉經以從

君陪縊於傍死而猶跽嗚呼若承恩可謂事君有禮不

忘其忠者矣夫人臣事主無二厥心爲其易者與爲其

難者途徑若分理道則一人臣之懷二心者倖圖苟免  
甘心事讎乃在平日侈讀詩書高擁爵位之人無論生  
無以爲人死無以爲鬼對若人其亦何地置足朕殲除  
巨憝用彰民彝旣禮葬懷宗皇帝於思陵因賜承恩塋  
域一區俾葬兆外以從厥志仍賜之香火田地豎之穹  
石使後世知艱危之際內員中乃尙有忠烈而死如承  
恩者

增

世祖章皇帝諭祭王承恩文 朕嘗考諸史冊見夫忠



臣烈士身殉國難名炳千載未嘗不掩卷三嘆也雖忠  
義之性命之於天人人可以自盡然變亂之際利害動  
於中禍患怵於外依違瞻顧多不能引決求夫風雨不  
渝其常霜雪不易其操者蓋難之矣若夫掖庭之中貂  
珥之列或恪恭著美或勤慎流徽若漢之呂強唐之張  
承業亦可謂賢矣至於國家多難秉志不移忠誠貫於  
金石氣節昭於日星尤足以激末流而挽頽俗也明司  
禮監太監王承恩者有可紀焉當明季寇訶海內鼎沸  
莊烈愍皇帝勵精圖治宵旰焦勞原非失德之主良由

有君無臣孤立於上將帥擁兵而不戰文吏嗜沓而營私以致羣寇縱橫不能奏績逮逆渠犯闕國勢莫支帝遂捐生以殉社稷而一時戴縵垂纓之士在平時則背公樹黨遇難則苟且偷生言之可爲太息唯有范景文等十九人無愧臣節業賜諡致祭以旌其忠然多士盈廷能赴義捐軀者蓋不多見獨承恩目擊艱危從容就義從死愍帝之傍其嶽嶽之風節卽古之忠臣烈士何以加焉旣乃託體山阿瘞骸林麓永近園陵常依隧道可謂式慰幽靈用綏貞魄者矣朕自踐阼以來斟酌前

代之典章洎夫有明恒深嘉歎其列代山陵近在畿輔  
向來永禁樵採守護維嚴於順治十六年因東狩駐蹕  
昌平覩勝國之松楸感廢邱之霜露諸陵周覽心惻久  
之爰至思陵念愍皇帝精勤遵亂亡國非辜躬奠椒漿  
尤增憫泣顧見陵側有土一坏卽承恩墓也特命從臣  
酌酒焉邇者當省斂之時展輪宵駕載履明諸陵拜陳  
醑醴復徘徊於思陵之所撫荒墟而灑泣瀝旨酒而痛  
心念茲從死之臣彌興節義之感手一卮命大臣拜奠  
其墓以勸忠也諡義危身奉上險不辭難曰忠故忠君

愛國庸人每未之逮貞烈之士毅然行之使百世之下  
聞而興起者慕義無窮也矧承恩趨侍宮掖出入禁闈  
其責任不繫乎封疆名位不同乎公輔而獨能視死如  
歸豈非較然不欺其志者哉以視世之讀書明大義負  
重名者變故當前依阿澆忍幸免旦夕其爲人賢不肖  
又何如也用是勒之貞珉使盡忠者以爲勸不忠者以  
爲戒且以告天下萬世之爲人臣者

御馬監太監王承恩順天人大同告陷上命承恩提  
督京營內外軍務居督府之上三月十八日夜承恩執  
鎗隨駕奪門不得出還至萬歲山下從上對縊于巾帽  
局而死王之心者舊司禮監掌印太監亦順天人甲申

二月廷議助餉衆言之心富甚家藏銀三十萬時之心  
閒任已久上卽日召論之之心以家計消乏爲辭次日  
進銀一萬兩泊李自成入繫之搜掠銀十五餘萬以未  
足三十萬之數拷掠至死他書有言之心自殉者故詳  
其實附志于此又有言殉難爲王之俊者益謬之俊於  
甲申冬同曹化淳共證僞太子事丁亥四月乘馬於道  
人猶見之傳說之謠  
如此 甲申傳信錄

朱彞尊原按思陵從死內臣有云王之臣者陳方  
策京師塘報是也有云王之俊者徐良光都門見

聞小紀馮夢龍甲申紀聞暨燕都日記是也有云

王之心者程源孤臣紀哭陳濟生再生紀畧李遜  
之三朝野史及闖賊犯北罪狀北變紀事等書是

也其云王承恩者許自俊甲乙彙畧劉尙友定思  
小紀吳邦策國諱忠奸實錄暨破夢閒譚國變錄  
等書是也崇禎遺錄謂王之俊納銀于賊倖免夾  
死而王之心者縊死于家傳聞各異而

世祖章皇帝有諭祭王承恩墓文故采錢秀才士軼所  
紀而附著所聞焉

欽定日下舊聞考卷一百三十七

欽定日下舊聞考卷一百三十八

京畿

順義縣

原順義縣在州東北六十里

明一統志

臣等謹按順義縣明初屬順天府正德八年改屬

昌平州

本朝仍屬順天府在東北六十里

**增**東西距八十里南北距五十里東至三河縣界四十里西至昌平州界四十里南至通州界二十五里北至懷柔縣界二十五里東南至三河縣治九十里西南至



大興縣治六十里東北至密雲縣治七十里西北至居庸關一百二十里

大清一統志

原縣在州東南九十里

昌平山水記

原幽州東北至順州八十里

續通典

原幽州東北三十里有望京館東行少北十里餘出古

長城又二十里至中頓又踰孫侯河行二十里至順州

夢溪筆談

原順州至燕京一百十五里

金人疆域圖

原秦爲上谷郡地

太平寰宇記

原漢爲土垠縣東二十里爲狐奴縣西三十里爲軍都

縣順義  
縣志

朱彛尊原按兩漢土垠屬右北平郡當在今豐潤

境內而縣則漢漁陽郡狐奴地也

增漢置狐奴縣屬漁陽郡後漢因之三國魏景初二年

廢晉復置屬燕國後魏廢

大清  
一統志

原後魏安樂郡故城在縣西北六里延和元年置交州

太平真君二年罷州置郡領縣二土垠安市北齊廢土  
垠入安市後周廢安市入密雲隋開皇初郡廢今爲安

樂莊永樂間撥給良牧署

昌平山水記

**原**土垠晉宋爲易京城後魏廢易京爲安樂郡今州北

負郭名安樂村

順州公解記

**原**北齊始置歸德縣屬燕郡後周廢唐開元中移燕州

於此仍置遼西縣爲州治

方輿紀要

**原**開元二十五年徙燕州治於幽州北桃谷山

唐書

朱彛尊原按此爲幽都縣治

臣等謹按桃谷山據

大清一統志卽桃山在今順義縣

**原**歸順州其地乃燕之北境卽元順州之北境開元四

年置爲契丹松漠府彈汗州部落領懷柔縣太平寰宇記

**原**歸順州天寶元年改爲歸化郡乾元元年復爲歸順

州同上

**增**屬河北道通考

**原**唐末爲順州遼史

**增**五代晉天福初入遼大清一統志

**原**遼曰順州歸寧軍又改歸化軍方輿紀要

**增**屬南京道遼史

原宋宣和四年金人以州來歸賜名曰順興宋史

原金仍曰順州

方輿紀要

朱彝尊原按明一統志順州之名始自隋然考之

隋書粟末靺鞨渠長度地稽內附止云居之柳城而已寰宇記云大業八年爲置遼西郡以統之亦未有隋置順州之文也唐貞觀四年平突厥乃以其部落置順祐化長四州都督府於幽靈之境其時順州僑治營州南五柳城後又僑治幽州城中寰宇記順州四至八到與范陽同東北至幽州一

百二十里則順州乃在幽州之南與今之順義初  
不相蒙矣至於開元中徙燕州於桃谷山雖今縣  
地然仍曰燕州繼爲朱滔所滅因廢爲幽都縣終  
唐之世亦未嘗以順州稱也直至梁乾化三年晉  
周德威拔燕順州地以順州名見此而五代史職  
方考後唐一百二十三州順州始在其列此紀地  
治者所當考也

朱彛尊又按唐書羈縻州一曰順州順義郡一曰  
歸順州歸化郡一以處突厥一以處契丹寰宇記

歸順州南至幽州八十里北至檀州七十五里東至薊州二百一十五里西至媯州二百里今之順義疑本歸順州歸化郡而非順州順義郡也

臣等謹按太平寰宇記煬帝初廢營州爲柳城唐

仍營州貞觀六年置順州寄治營州南五柳城遼史誤以唐置爲隋置明志因沿其誤耳至順州非卽今順義地按通典順州在范陽郡城內天寶初置尋改爲順義歸化兩郡今考寰宇記順州順義郡領縣一賓義四至八到與范陽同范陽爲故幽

州卽今順天府境歸順州歸化郡領縣一懷柔另  
有四至八到西南至幽州七十五里今順義縣境  
正在府東北六十里地界相符彙尊以縣爲唐之  
歸順州歸化郡非順州順義郡是矣至寰宇記所

云順州四至八到與范陽同乃指范陽郡言通典

謂在范陽郡城內可證彙尊乃以涿州之范陽縣  
當之云東北至幽州一百二十里則歸順州又在

幽州東北七十五里兩地相距幾及二百里中隔  
幽州一城界址不屬與寰宇記所云歸順州卽元



順州之北境其說相悖是則誤以范陽郡爲范陽縣又彝尊之失考也

**原縣**二溫陽密雲金史

**原元**廢縣存州元史

**原明**洪武二年降爲順義縣清類天文分野之書

**原初**屬順天府正德八年始屬昌平州方輿紀要

**原城**縱橫四里南昂北俯又東北突出一隅肩臂四折入於河濱宛如龜背形周圍一千一百三十五丈九尺連堞高二丈五尺濠塹四周深一丈五尺其門南曰迎

恩東曰平秩西曰晴嵐北曰疊翠

順義縣志

**增**城周六里門四濠廣四丈明萬歷中甄築

本朝康熙十七年十八年重修

大清一統志

**增**順州故城今順義縣治唐開元中移燕州於此後改

順州

同上

臣等謹按此爲唐末之順州卽歸順州也

**補**順州舊治唐歸順州見大歷五年試太子洗馬鄭宣

力所撰開元寺碑金節使剛忠王公子明死節於此

秋澗

集

增乾隆十年

御製雨中過順義縣詩 曉看春雲膩驅車冀野行忽

霑垂柳色似聽滴桐聲釋矣懷人感時哉望歲情披蓑

荷鋤者相率事深耕 春寒雨作雪春暖雪爲雨前口

與今朝佳境隨時覩密雲失遠峯新溜添曲渚浙浙復

濛濛極目迷空所 歷歷綠塍鱗來牟色倍新榆烟低

處潤村靄澹初勻鳥噪驚簷瀑人欣汜路塵無花良亦

可不是爲尋春

增乾隆三十四年

御製過順義縣城詩 行行過縣城陌柳颺煙輕白水

橋爲渡青郊塵不生藩宣察吏治保障厘民情安樂真

安樂

是縣古名安樂

春田雨遍耕

臣等謹按過順義縣城

御製詩謹釋有關紀述者恭載卷內餘不備錄

**增**縣治西從東直門出京往古北口驛路一道境內計程四十八里自大興縣界古柳樹一十二里至治而三家店有

行宮駐蹕自三家店二十里至牛欄山鎮又一十六里

至懷柔縣界

順義縣冊

臣等謹按三家店

行宮正殿恭懸

皇上御書額曰無踰此地西室聯曰詩情詎花柳樂意  
在農桑又聯曰庭饒芳草鋪生意座有芸編結古  
歡捲房額曰折旋中矩聯曰雜花分戶映空翠落  
庭陰又聯曰紅桃綠柳天然趣夕惕朝乾依舊身  
又聯曰風烟有奇狀物象歸餘清佛室聯曰八德  
靈源超覺海三明妙境照慈燈皆

御書

○縣治西北發

圓明園往熱河驛路一道境內計程二十五里自昌平州界官莊橫道一十二里至治西北南石槽有

行宮駐蹕從南石槽岐路三里至北石槽又十里至昌

平界

順義縣册

臣等謹按南石槽

行宮前殿東室恭懸

皇上御書聯曰山光積翠遙疑雪鱸篆浮香近若雲西

室聯曰縱目怡宜遇寥朗託懷又喜得清舒佛室  
聯曰華海慈源分一滴金輪妙果演三乘

後殿額曰竟川含綠西室聯曰列幃拖藍晴橫朝靄碧  
千畦環秀香擁暮雲黃東室聯曰雜卉晞陽爭蒨  
絢喬柯得蔭亦森沈皆

御書

乾隆六年

御製石槽行宮對月詩 殘靄全收晚景妍疎楊影裏  
漏嬋娟詩因望夕清添興光到深秋皎徹天別院初迴

飛蓋駐行營兩見皓輪圓何殊上苑憑吟處桂子風微  
夜未眠

增乾隆九年

御製順義縣行宮作 將爲田盤行趣此秋成閒旌麾

歷冀野輪蹄背湯泉朝暎散曩溫入我輿帷暄塗霜帶  
冷白坂花垂紫殷枯樹雀飛飛廣陌兔爰爰芻棚隱茅  
落罷喘牛高眠困鹿戶有積室家幸苟完所見扶鳩翁  
尙鮮怨祁寒由來歲功成降康端自天行宮建勝地樹  
石誠有年葺新成此日止頓因路便匪誇棟有芝詎必



池菑蓮記我書室名是處欣隨安明窗受暖曦市語隔  
煩喧染翰濼思抒習靜道心存愜適以爲佳奚必居深  
山

臣等謹按石槽

行宮

御製詩謹繹有關紀述事實者恭載卷內餘不備錄

**原**前代州治爲小城方二里許四隅角樓遺跡尙存至  
元二年節度使劉瑜建大廳并長廊二十八年知州大  
興王居政於廳左右構捕盜所吏日幕次復構架閣庫

祇候直舍大德七年知州鉅野段廷珪作後廨並東西  
房皇慶初知州大興梁彥義起儀門高三丈餘翰林學  
士清河元明善爲之記其驛館至元十八年州倅李讓

荆焉

梁宜順州  
公廨記

**原**元明善順州儀門記 古者諸侯三門皋門應門路  
門今之州準古伯子男之國作儀門禮也溫榆水之陽  
有古城焉曰順州隸大都路地沃而民淳國家罷兵百  
年涵濡撫育生殖日繁蔚爲饒郡郡城據亢爽地郡廨  
特當其亢亢有故儀門址至大四年知州事梁君彥義  
始來明年百廢次第舉民用大和乃謀諸監郡將建岑  
樓於址僉曰休哉民皆子趨以獻工肇事於皇慶元年  
秋七月畢工於二年夏六月登其上北望則紅螺峻極  
雖五十里外若接闌檻東北曰黍谷鄒衍吹律之山也  
潮潞二水會於白激經城東而南注吳船來集通元橋

下其西南則天都霄漢觚稜金爵隱然鬱葱佳氣之間  
羣情大悅咸曰是不可不著興建之歲月予太史也書  
必稽之典禮俾知今之州準古諸侯之國不爲不重  
興作制備而從民志則太史喜爲之書 清河集

**增**順義縣署在城內正北明洪武初建

畿輔公署志

**增**舊治堂康熙十八年地震廢五十五年邑令黃成章

修葺乾隆十年重修

順義縣志

**原**順義學在縣治西洪武八年重建

明一統志

臣等謹按順義縣志縣學舊址在西門內北小巷

元改置通衢卽今址明崇禎七年重修

本朝康熙十九年邑令鄒琬重建

原元梁宜順州廟學記 宣聖廟未詳建於何代金明  
昌初提刑萊州劉仲洙降漕司錢五百千同知州事著  
作郎狀元瓜爾佳中孚繼出俸金鄉進士馬湘寶鳴道  
相與翼佐營葺殿廡肖御史中丞孫郎康所寄曲阜石  
本聖賢像俾繪塑之鑿井於圃廩給生徒欲構講室未  
克見泰和元年秘書少監李暘重修記聖元南牧遂毀  
於兵獨禮殿存焉四無垣墉鞠爲牧場郡人中書右丞  
贈平章事順國宣靖曹公庭瑞以廟學久廢爲慮迨至  
元辛未知州郭幹繕殿之摧漏起東西兩廡殿後隘無  
數尺宣靖公懇寺僧高其價得表五丈廣倍之知州故  
福建道宣慰司都元帥段廷珪增塑鄒亮二公貌七十  
子更爲明倫堂泰定甲子宣靖公之子工部尙書偉念  
繼先志發私帑楮幣而甲匠提舉司達嚕噶齊郭伯達  
耆士富察晉柴唯允共贊之剏神門左右齋學掾居室  
賓幕庖庫靡不全備仍甃巨井丙寅達嚕噶齊今監察  
御史多羅台知州王汝楫以其前阻隘巷乃市地南撤  
東西通達上作櫺星門由是行道之人莫不嘆美丁卯  
工部公於江浙造銅禮器二百三十事復購經史若干

卷宜守是州刊加封大成詔圖十儒像益弟子員割錢  
千緡規息以資朔望祭物但關於祀事教典者悉皆告  
完順義縣志按瓜爾佳舊作夾谷從八旗姓  
譜改正多羅蒙古語七數也舊作托刺今改

**原**營州左屯衛在縣治東

明一統志

臣等謹按左屯衛今廢

**原**衛本屬大寧永樂元年移於此領左右中前後五千

戶所

昌平山水記

**增**漕河營在縣東北牛欄山東南有把總戍守

大清一統志

**原**縣西北三十里有石槽三日東石槽南石槽北石槽

元史上都兵入古北口其知樞密院事準台以兵掠石

槽是也 昌平山水記 按準台義 見前舊作竹溫台今譯改

**增**元致和初上都兵掠石槽雅克特穆爾遣薩敦掩擊

敗之卽此 大清一統志

**原**福山在縣南五里 順義舊志

**原**孔山在縣南 明一統志

臣等謹按水經注山上有洞穴開明故土人以孔

山稱據

大清一統志在縣南二十餘里

**原**龍山在縣南二十里下有龍泉 明一統志

桃山在縣西北三十五里舊唐書謂之桃谷山山有五峯如桃花瓣巨石錯落橫亘數畝元致和初上都兵入古北口留重兵屯燕樂城以輕騎進抵桃山雅克特穆爾掩擊之於白狼河追至桃山降其衆燕樂聞之遂潰白狼河卽白河也一云白狼河在縣西北三十里

方輿

紀要

原史山在縣西北三十五里山石戴土高百餘丈狀如眠弓南望京師城闕金碧眩目寺宇皆唐時建

名勝志

臣等謹按順義縣志山有臥佛寺

原縣北二十里爲牛欄山山上有洞俗傳有金牛出焉  
至今洞前石壁爲小槽形名曰飲牛池山北里許有小  
山昔有仙人騎牛來遊因名靈蹟山宋王曾上遼事曰  
順州至檀州漸入山牛欄當其要路也山之東麓潮白  
二河合焉有龍王廟山之東南爲漕河營有城二門把

總一人守之

昌平山水記

臣等謹按畿輔山川志亦名金牛山

原遼置牛欄都統領司

遼史百官志

補帝次牛欄山欲盡戮漢軍穆呼哩以舒穆魯拜達勒



可用奏釋之

元史

**原**牛欄山改名順義山

明一統志

**原**牛欄山與狐奴山相望其第三峯腰帶間一洞相傳

曾有金牛出食禾稼田峻逐之遁入洞穴有投以甌石

者輒聞水聲或以物擲之良久自山傍白河浮出其北

里許靈蹟山二山一脈前山石身負土後山土身戴石

前大後小行人揔以牛欄名

長安客話

**原**順州北有銀冶山

元混一方輿勝覽

臣等謹按據

大清一統志山今在密雲縣南十五里

**原**順州東北過白嶼河北望銀冶山

王文正上遼事

**原**呼奴山亦名狐奴山

明一統志

**原**縣東北二十五里爲狐奴山水經注水不流曰奴蓋

以山前豬澤名也其北麓鳥道而上里許漸澗漸平有

寺寺後有小石城山下有龍潭今涸山西南百步有漢

狐奴縣故址魏文帝黃初二年省

昌平山水記

**原**曹王山曹操嘗駐軍於此

遼史

**原**沽水西南流逕狐奴山西又南逕狐奴縣故城西漁

陽太守張堪於縣開稻田教民植種百姓得以殷富童  
謠歌曰桑無附枝麥穗兩岐張君爲政樂不可支視事  
八年匈奴不敢犯塞狐奴王莽之舉符也

水經注

**原**白河經靈蹟山黃花鎮川河入焉又南經牛欄山東  
麓潮河流合焉又南逕縣城東門外

方輿紀要

**原**道人溪水南流逕孔山西上有洞穴開明故土俗以

孔山稱

水經注

**原**縣西南二十里有天柱村三十里有葦溝村村東臨  
溫餘河渡渡南有長城遺跡遼史順州南有齊長城城

東北有華林天柱二莊遼建涼殿春賞花夏納涼者也  
齊長城天保中所築沈括曰幽州東北三十里有望京  
館東行少北十里餘出古長城卽此

昌平山水記

**原**溫餘河卽昌平之榆河下流爲沙河入順義西南界  
下至通州入潞河順義謂之西河金人名縣曰溫陽以  
此遼史作溫榆河本水經注之濕餘河以字相似而譌

也

同上

臣等謹按許慎說文濕水爲灑水之訛則濕餘溫

餘並當作灑餘水

原順義縣有井一日三溢海潮則大溢相傳源與海通

民疏其水為渠灌田百畝號曰聖井

燕山叢錄

原狐奴縣舊城在縣東北三十里狐奴山西麓

順義縣志

原唐南河縣故城在縣東南二十五里而軍都縣故城

在縣西三十里蓋軍都之別徙者也

昌平山水記

原城內四達之中有白石幢下方上銳每方廣二丈高

三尺又上重之八角各高二尺餘刻獅象海馬之形又

上為十二欄干為千葉蓮花座又上漸狹漸圓中石心

一圓刻佛像千尊外石柱六各盤螭虎四距又上竹節

小稅可三尺餘又上荷葉寶蓋二尺餘四門城樓僅與  
幢基址平遙望之層層如雲中麾蓋也同上

**原**縣西三十里有燕王冢或曰水經注所謂濕餘河在

燕王陵南者也同上

**原**開元寺有唐大歷五年試太子洗馬鄭宣力撰碑秋澗

集

**臣**等謹按開元寺在縣治東隅俗稱為東大寺

**原**締興寺在縣治西南洪武八年建明一統志

**臣**等謹按締興寺在縣治西門內俗稱為西大寺

補順州有龍雲寺

元崇國寺碑陰

原呼奴山白雲觀有元大德八年集賢學士宋渤碑

水

亭雜

識

原宋渤白雲觀記畧

真人張霞卿弟子張道寬居順

州之呼奴山白雲道觀能以符水救人大丞相東平王嘗有瘍生體中醫藥罔效道寬治以符水遂愈王爲之構觀云

順義縣志

原王梁爲郡吏太守彭寵以梁守狐奴令

後漢書本傳

原上谷太守任興欲誅赤沙烏桓烏桓怨恨謀反詔鄧訓將黎陽營兵屯狐奴以防其變訓撫接邊民爲幽部

所歸

同上

**原** 遼聖宗統和十二年十二月獵於順州西甸

遼史遊幸表

**原** 王晦字子明澤州高平人貞祐初爲戶部郎中以部

兵守順州時通州圍急晦攻牛欄山以解通州之圍遷

翰林侍讀學士及順州受兵晦誓死不去將士縋城出

降被執不屈以死謂其愛將牛斗曰若能死乎曰斗蒙

公見知安忍獨生并見殺贈榮祿大夫樞密副使有

司立碑歲時致祭錄其子汝霖爲筆硯承奉 金史

**原** 順州山中有異獸如馬而食虎豹遼人不知其名以

問劉敞敞曰此所謂駮也爲言其形狀聲音皆如所見

人歎其博物

東都事畧



欽定日下舊聞考卷一百三十八

欽定日下舊聞考卷一百三十九

京畿

懷柔縣

原懷柔縣在州東北一百里

明一統志

臣等謹按明正德初以縣屬昌平州

本朝改屬順天府在府東北一百里

**增**東西距二十五里南北距三十八里東至密雲縣界二十里西至昌平州界五里南至順義縣界十里北至密雲縣界二十八里東南至平谷縣界九十里西南至昌平州界五十里東北至密雲縣治四十里西北至昌

平州界三十里

大清一統志

**原**懷柔縣其地乃燕之北境太子丹使荆卿獻地圖蓋

謂此地

太平寰宇記

臣等謹按太平寰宇記此條爲歸順州所理之懷

柔乃今之順義

**增**漢漁陽縣地唐初爲密雲昌平二縣地

大清一統志

臣等謹按此爲今之懷柔明洪武中分置之地

**原**唐貞觀六年置懷柔縣治五柳城改順義縣開元四年置松漠府彈汗州天寶元年改歸化郡乾元元年復

今名

遼史

臣

等謹按太平寰宇記順州理賓義縣唐貞觀六年置寄治營州南五柳城天寶元年改爲順義郡乾元元年復爲順州四至八到與范陽同此順州也通典所謂順義郡置在范陽郡城內者是矣歸

順州理懷柔縣卽元順州之北境開元四年置爲松漠府彈汗州天寶元年改爲歸化郡乾元元年復爲歸順州是歸化郡乃松漠府彈汗州所改其

地南至幽州

卽范陽郡

八十五里西南至幽州七十五

里爲今順義縣地朱彛尊所云今之順義本歸順  
州歸化郡非順州順義郡是也至今懷柔乃明初  
析昌平密雲地所立雖取古名實非舊地考遼史  
順州歸化軍領縣一懷柔有溫餘河金史領縣二  
溫陽密雲溫陽溫餘水之陽也卽懷柔所改今溫  
餘水入順義北界不經懷柔界是可證昔之懷柔  
爲今順義而非懷柔矣遼史此條混歸順州於順  
州固多舛錯彛尊旣以歸順州爲順義復以此條  
并下條載入懷柔是又混懷柔於順義矣

**增**歸順州歸化郡本彈汗州貞觀二十二年置開元四

年更名縣一懷柔

唐書地理志

**原**金明昌六年改為溫陽縣元廢

方輿紀要

**臣**等謹按此為今之順義

**原**明洪武十三年分密雲昌平二縣地建懷柔縣在順

義縣北屬北平府

清類天文分野之書

**臣**等謹按此為今懷柔地

**原**縣屬順天府正德中改州屬

方輿紀要

**增**乾隆六年

御製懷柔縣詩 山圍古郡富耕桑此地前朝是戰場

四海懷柔原在德由來禮義固金湯

曾乾隆二十五年

御製懷柔縣東詩 懷柔縣東潦盡灘長橋空臥沙渚

寬去歲曾此待度難菱隄絞縛劬且艱事半功倍古有

言不如乘時理信然村民道左鞠脰蹠年年許覲顏尺

咫今秋收穫詢如何都道人和緣歲美觀茲景象寧不

喜陡憶下河復被水多方賑恤付有司曾否勤宣善經

理中心藏之何日已

增乾隆二十六年

御製懷柔縣東疊去歲詩韻 去歲此經乾石灘今秋

一望潦水寬柳橋縛架又值難昨宵待宿工就艱逍遙

河上風人言前秋景况今復然

去歲過縣東秋潦已盡視已卯經此新漲方盛

情景迥殊曾有詩紀事今年所值與前歲畧同命侍衛等相視便道測流徑渡並不需前詩菱櫂絞縛之勞矣

一二地方吏來聽請罪進寸退且咫笑謂更不須汝曹

羽林一一雄才美厄魯回人尤色喜撤捩踴躍善行水

牽駝驅馬須臾間輕裝運畢百度理我亦乘舟渡河已

增乾隆四十六年



御製彈汗行

路經彈汗州

懷柔縣貞觀二十二年建彈汗州

因作彈

汗行自昔蒙古長原有汗之稱長城以北東西亘各據

部落雄相爭文皇欲彈壓若輩邊州因以此額泐巖城

而何四夷君長上尊號既笑卻之後乃賜書四夷遂用

可汗名

唐太宗貞觀中西北君長請上尊號爲天可汗却之然其後賜書四夷及屬國上書遂稱天可

汗彈汗行慢言唐事試言我皇清四十九旗爲舊屬久

去汗號惟以王公帶礪百世榮

科爾沁等旗舊亦有稱汗者自太祖

太宗時內附卽請去其汗號受王貝勒公等封矣

四喀爾喀實後附仍其汗號

乃我

皇祖沛恩宏

喀爾喀于康熙年間爲噶爾丹所逼棄其部落挈人戶求內附 皇祖許其來歸

故車臣汗烏默赫札薩克圖汗額爾克阿海巴朗尋皆仍存其舊號與四十九旗同備藩服

朕雖不

德定準部亦存其汗號都爾伯特至今世祿其孫曾

乾隆

二十年平定準噶爾部封都爾伯特與綽羅斯輝特和碩特四族台吉爲四汗並分建王貝勒貝子公遊牧如四十九旗喀爾喀之例嗣綽羅斯輝特和碩特部落尋以叛逆自取滅亡惟都爾伯特始終恪守臣節其子孫世受封爵部落其餘自作孽覆祀非我黷武逞嘉兵

綽羅斯汗

自噶爾藏多濟被戮後其族屬殄滅無幾輝特汗巴雅爾亦以叛逆誅和碩特汗沙克都爾曼濟心懷攜貳殲之于巴里坤皆因反覆煽亂自底滅亡非欲嘉兵黷武也其原委詳見西師詩至土爾扈特汗亦準噶爾四衛拉特之一初竄歸俄羅斯傳數世至渥巴錫挈全部戶口十萬餘來歸因命仍其汗號分地安居贍給耕牧一

遵皇祖收撫喀爾喀之例最後土爾扈特自歸順  
優加恤賚詳見歸順優恤二記

仍其汗號無庸更彈汗行何須彈壓惟厘懷柔情各部  
入覲循茲以入京億萬斯年受恩保土與國享昇平

增乾隆四十七年

御製過懷柔縣詠古詩 彈汗貞觀名蓋因突厥輯以

武開元易懷柔圖撫以文繩厥祖徒武失剛徒文柔胥

非中道那永輯而撫雖然用剛過者其禍速不如用柔

禍緩略能久叶得其中者信難哉要在文武并用無逸

以為所懷柔去京百餘里古所謂守在四夷者即此祇

今伊犁建城興屯田其遠較茲奚啻倍而蓰此非誇也  
實懼乎自我得之敢不業業兢兢守在已復申其說曰  
要于敬

天愛民而已耳

臣等謹按懷柔縣

御製詩謹繹有關紀述事實者恭載卷內餘不備錄

**原**王世貞懷柔道中作 馬足吾何限山行稍自寬人

家梅雨色衣袖麥秋寒過瀑添新徑歸雲改故巒斷腸

沙雁起一一向長安 弇州山人稿

**原**楊旦懷柔道中作 春城樹樹亂啼鴉鎮日山行未

見花田野蕭條村落靜土橋

茅屋兩三家 惜陰小稿

**原**縣舊有土城創自洪武十四年至成化三年易以甃

石弘治十五年以城大民少去其西偏而城其東偏開

三門東曰咸陽南曰拱衛西門最小以便汲水知縣事

保德李士元開大門於西名曰留照復易東門曰迎旭

南門曰開薰西小門曰湧泉隆慶二年增設甃城敵臺

萬歷八年知縣屯留龐鳳鳴闢東小門名曰通利懷柔縣志

**原**懷柔城大兵少弘治中截其東偏而築之故縣治在

西門也城周四里六十步三門嘉靖末設兵備僉事於

此尋罷後以守備一人駐焉昌平山水記

補懷柔城極堅整西南在平地東北則因山爲之其南甕城可盤馬麗譙片石記萬歷九年增修丈尺末云並用純灰鋪底灌坻全完以垂永久宜其歷百年尙如新築也

溫陽紀畧

臣等謹按縣志明成化三年巡撫閻某重修弘治

十五年兵備道錢承德改築有大學士謝遷碑隆

慶初縣令蔡孔泮增設甕城敵臺萬歷八年邑令

龐鳳鳴重修仍易其門又開一東小門添設城樓

三其後邑令賈濬復加修葺有賈濬碑三十三年

久雨城圯邑令史國典請修有昌鎮營遊擊管朝

爵城工記其後東大門西小門俱閉止留三門

本朝康熙五十九年地震城北面圯六十年四月

聖祖駐蹕懷柔

特命修築越明年告成

**增**謝遷重修懷柔城記 懷柔爲邑東連密雲潮河以抵于山海西接昌平居庸以及于雲中實古幽燕之域也我太祖載造區夏於是割昌平密雲二縣之地爲懷柔以屬於北平及太宗定鼎燕京陞北平爲順天而懷柔仍隸之經制之初城郭未備比歲巡撫都御史錢塘洪鍾按節是邑召知縣事祥符劉淮授以規畫俾圖新之於時山東按察副使姑蘇錢承德適領兵備之任專董其役畚鍤雲集板築並興城以丈計者二千有奇外

悉甃以磚石樓櫓雉堞畢備關二門以通出入東曰咸陽南曰拱衛引渠通水道俾無淫潦之患始事于弘治壬戌之春二月六閱月而告竣功既畢邑庠訓導閩人黃璋請記其成弘治十六年夏五月日立石

**增**管朝爵重修懷柔城記 萬歷己巳春懷柔城以淫

雨傾頽邑侯史君爲保障慮申請修築以不佞任分修之責先分外口磚城自東北角臺起至南門東止凡五段共長七十丈八尺裏口西門甕城磚工一段長七丈二尺繼分修隨牆土城自東北角起南至東南角臺西空止凡五段共長七十一丈八尺大西門迤北土城一段長二十五丈西門迤南土城一段長二十五丈共土城一百二十一丈八尺俱用塼頂女牆磚灰疊砌裏外口磚土城工共一十三段共長一百零八尺自二月十四日始至五月初十日報竣萬歷三十三年五月日立石

**原**唐順之登懷柔城作 塞下孤城古白檀半臨平野

半依山秋來亭埃無烽火官馬千家苜蓿間 荆川集  
**增**查慎行雨後過懷柔城外詩 火雲突兀壓城頭地



近黃花古戍樓好是綠陂新過雨  
路平如掌接檀州 敬業堂集

**增**

行宮在南門外

懷柔縣志

臣等謹按懷柔縣志康熙四十九年始以三教堂

舊址改建祇園寺遂建

行宮於其地五十三年增修

正殿東室恭懸

皇上御書聯曰日同碧宇朗無盡心與白雲散以閒西

室聯曰千畦香撲黃雲徧列嶂屏拖碧靄橫佛室

聯曰覺路圓通參妙諦法幢清淨領真香

後殿東空聯曰輕風楊柳迎頭爽濃露郊原蓄目清皆

御書

增乾隆二十九年

御製懷柔縣行宮停蹕詩 彈汗緣耀武歸化欲敷文

自在綱維挈寧關名字紛行宮纔數字停蹕迴堪欣敦

樸欽

先典吾惟揚覲勤

臣等謹按懷柔縣

行宮

御製詩恭載首見之篇餘不備錄

**增**縣治在大西門內歲久庳壞康熙五十六年邑令吳

景果卽舊址構堂五楹曰黍春堂堂前古栢四株三百

年物也堂東偏古樹之下構書室三楹移植紅螺山叢

篠數竿於軒下曰螺竹軒

懷柔縣志

**增**吳景果黍春堂記

縣治自門垣以至堂寢歲久頽

壞余至斯就縣廳後考中堂三間爲視事之所歲丁酉

二月大雪中堂亦傾乃卽舊址構堂五楹視舊稍軒敞

焉會湘潭陳公滄洲來署道篆爲書其額曰黍春堂蓋

以斯邑地小民貧有待於吹暖律而布陽

和也康熙五十六年八月記

縣治石刻

增縣學在縣治東明洪武十五年建

大清一統志

原縣學明倫堂成化庚寅教諭餘姚趙顒所構泮池萬

歷甲午知縣全州蔣守浩所鑿

懷柔縣志

臣等謹按明洪武初設縣卽立縣學成化中有修

撰王華重修明倫堂碑萬歷中有教諭胡朝卿創

鑿泮池記天啓三年重修大殿崇禎七年增修兩

廡戟門啓聖祠明倫堂有教諭王建極碑

國朝康熙五十五年邑令吳景果重修

增王華重修懷柔學明倫堂記  
懷柔乃京兆屬邑往者嘗議修學不果講堂歲久傾圮成化庚寅餘姚趙先

生願泣教是邑與諸生之賢者商推其事又募之富室  
得緡若干十日鳩工制倍于昔時諸生請立石先生止  
之暨先生秩滿轉官閩之政和閱二三寒暑訓導池州  
葉君勝詢得明倫堂營膳之由慨然請予言勒諸石  
胡朝卿創鑿泮池記 懷柔建學垂二百年有奇泮  
池獨缺萬歷癸巳全州蔣公守浩來泣茲土下車謁廟  
咨嗟久之越明年甲午春進諸生諭以意擇日興工鑿  
池于櫺星門內周七丈深十尺起三橋樹以欄杆砌以  
珉石至于櫺戟二門東西兩廡壞者補隘者拓  
悉捐俸僱辦三旬告成萬歷二十年仲冬立

**原廣濟倉在懷柔縣城**

四鎮三關志

**臣等謹按縣志廣濟倉今廢**

**增藏冰窖在縣二門東每歲冬月工部行令藏潔冰三**

**千塊以備用**

懷柔縣志

**增**大水峪關在縣東北三十里河防口關在縣北三十里神堂峪關在縣北二十里開連口關在縣北二十五

里同上

**臣**等謹按四關皆密雲石塘嶺關都司所轄舊志

自白峪以西摩天峪關凡九口皆載入縣境今白道峪牛盆峪小水峪三關屬密雲渤海所摩天峪二關屬昌平唯自大水峪以西至開連口之黃草窪邊城凡六十里為懷柔縣境詳見邊障門

**增**紅螺鎮在縣北十里

大清一統志

羅山在縣東十八里

同上

栲栳山在縣東南九十里山前有雲巖寺又有硤堂

寺

懷柔縣志

臣等謹按據

大清一統志栲栳山在縣東南八十六里

龍王山在縣西半里舊城環其上下有龍潭深不可

測

大清一統志

原縣西三里爲石塘山有大工則採石焉設工部廠

不自

山水記

臣等謹按明工部廠今廢

增灰山在縣西四里

懷柔縣志

增峯山在縣西南五里三峯高聳上有真武廟山屬昌

平東址爲懷柔界

同上

原紅石山在縣西北三里山頂有石泉瑩潔如玉一名

玉泉山

同上

臣等謹按據

大清一統志泉在山頂石窟中

增景山在縣北十八里山麓有定慧寺今廢

懷柔縣志



原紅螺山在縣北二十里高二百仞下有潭潭中嘗有

二螺色殷紅夕吐光燄土人異之因以名山明一統志

增山高二百仞石山也衆山皆青沉沉獨黑日午麗之

不秋而紫帝京景物畧

原紅螺山有泉一綫以珍珠名其水湧如噴珠長安客話

朱葵尊原按遼史檀州有螺山金史順州有螺山

王沂公上遼事順州東北有螺盤山皆指是山也

臣等謹按遼史檀州統縣二密雲行唐金史順州

統縣二溫陽密雲今懷柔爲密雲所析葵尊以螺

山爲卽紅螺山似非無據但考太平寰宇記密雲  
有桃花山螺山今其地皆屬薊州據

大清一統志密雲東南至平谷界九十里又東南至薊  
州界六十里共一百五十里寰宇記密雲東南至  
薊州界一百九十里則舊時密雲所屬之地尙有  
四十里入薊州界然考魏氏土地記云漁陽城南  
五里有螺山漁陽今薊州治據此是薊州近界當  
又別有螺山非卽今懷柔之紅螺山矣謹附識之  
以備考

原溫陽有螺山淑水兔耳山

金史

臣等謹按今兩山皆不得其處考一統志華山一

名兔耳山在三河縣北三十里今順義南界順義

金溫陽也據此則舊時所屬之地今互入三河故

山在其界又明胡濙栲栳山雲巖寺碑有云勅賜

近寺兔耳山花板石應用栲栳山在縣東南七十

五里亦正近三河之北也螺山今在薊州詳前條

原縣東北二十里有神山又有金鐙山山頂夜常有光

因建金鐙寺

懷柔縣志

○卸甲山在縣東北三十二里

大清一統志

○象山在縣東北四十里山形如象

懷柔縣志

臣等謹按原本內尚有黍谷山七條在縣東四十

里今縣東止二十里則山在密雲西界也謹據

大清一統志改入密雲

○縣東七里為白河又東十五里為潮河

昌平山水記

臣等謹按一統志白河從密雲西界南逕縣東又

南逕順義界潮河自密雲縣東南經縣東至順義

北

原縣東三里有小泉河又東五里有雁溪俱流入白河

懷柔縣志

臣等謹按縣志小泉河源出紅螺山珍珠泉雁溪

源出塞外經神堂峪由縣東王化莊入白河

原七渡河在縣西南一里

懷柔縣志

原朝鯉河亦名七渡河

王文正上遼事

臣等謹按縣志七渡河發源塞外經黃花鎮川至

縣境下入白河

原浮橋五處西大橋在縣西一里南富樂橋在縣東一

里疊道小橋在王化莊下有泉源匯爲深潭土不能墊

故架橋焉王化莊橋在王化莊東東大橋在房家莊西

北懷柔縣志

釣魚臺在懷柔縣西三里山水殊勝澗流至此廣丈

餘橫板橋以渡東南一望渚烟村樹彷彿江鄉溫陽紀畧

孤臺在縣北三里舊有金勝寺塔今廢懷柔縣志

碗堂寺在縣東八十里漢特名曇泉寺明正德中改

今名大清一統志

祇園寺在南門外同上

臣等謹按寺內大殿前簷恭懸

聖祖御書祇園寺三字額後殿前簷額曰示眞實相亦  
爲

聖祖御書

奉聖寺在城西南五里有明尙書甘爲霖詩碣寺今

廢碣移城隍廟

大清一統志

能仁寺在縣治西北洪武十八年建

寰宇通志

紅螺山麓有資福寺古之大明寺也創於金皇統初

年距縣一十五里又有定慧寺亦在山麓建有萬壽齊

天二塔距縣一十八里

懷柔縣志

臣等謹按縣志資福寺在縣北二十里有元大學

士樊從義碑稱寺創自金皇統初明正統丁巳重修

本朝康熙三十三年

聖祖臨幸茲寺定慧寺在縣北十八里景山之麓明正統中建有尙書胡濙碑今廢二塔尙存

**補**紅螺山大明寺碑元昭文館大學士太史院使領司天監事樊從義撰文宣文閣監書博士兼經筵譯文官



王與書稱寺始於唐金世宗大定間召佛覺禪師於真定之宏濟來住茲山元仁宗時詔雲山禪師以榮祿大夫大司空佩一品銀章主大聖安寺內侍大司徒王伯順以大明爲聖安宗派請太皇太后發帑五萬爲修寺之資至正中雲山從聖安歸老于此盡捐前後所賜金帛重修焉蓋沙門檢校司空在遼時已然金元循之不改也碑又云兩紅螺死爲雙浮圖瘞之寺中今寺一池曰紅螺池三面皆果園花時遊覽頗勝殿西有竹一畝寺東南二里許爲明懷寧侯孫武敏公墓有兩碑一李

賢撰一彭時撰中一碑刻諭祭文

溫陽紀畧

**增**禮部尙書胡濙景山定慧寺碑畧

都城東北懷柔

縣景山之陽去人境雖不遠而巖壑鬱紆峯巒峭拔泉  
清水深最爲勝處經始于正統七年建前後大殿藏經  
殿天王殿兩廡山門方丈祖師伽藍齋室禪堂庖福庫  
庾鐘鼓二樓僧房垣墉畢備八年二月二十七日賜今  
名其寺北據景山東倚大荆山西接紅螺山南望小荆  
山一大叢林也普照廣明碧峯永安圓  
明寶安諸山梵刹及泉水菴俱爲下院

**增**雲巖寺在栲栳山向有道院名栲栳磚金乾統中華

巖祖師居此有沙門圓揆塔記明景泰中重建勅賜今

名有尙書胡濙及沙門德洽碑成化中重修有大學士

商文毅公輅重修記

懷柔縣志

金華嚴祖師義琛玉田李氏子幼喪母事繼母以孝  
聞年十二辭家訪道得清虛修煉之術父訪令還家更  
習儒業通文史壽昌五年試中甲薦名上不赴遂爲僧  
乾統初於栲栳磚立小院前後訪法者二百餘人後染  
未疾入定如眠有紅光發於頂面照滿一室今塔尙存

同上

曾胡澗栲栳山雲巖寺碑畧 雲巖寺在京師東北百  
餘里順天府懷柔縣栲栳山前年深傾圮捐資召匠先  
大雄殿次天王殿觀音眞武二閣法堂方丈僧舍齋堂  
鐘鼓二樓享堂東西兩廡行者寮休息亭庖福庫庖繚  
以圍垣景泰六年五月十五日賜額其近寺兔耳山花  
板石并越府草場田土俱賜本寺應用景泰六年某月

日立

**商**輅重修雲巖寺碑畧 景泰初因栲栳山古刹遺址建殿宇賜額曰雲巖禪寺近歲殿廊漸毀地土荒蕪成化丁亥六月奏復前地再葺修建寺獲更新庚寅秋九月重陽日記

**原**縣東南九十里有髻髻山二峯高聳上有碧霞元君

祠 昌平山水記

臣等謹按髻髻山東四里建

行宮一所正殿恭懸

皇上御書額曰巖蒼樹古西室聯曰天地為鑪游心物

以外詩書敦好尙論古之人捲房額曰韻松軒聯

日端居向林藪勝賞在煙霞佛室聯曰琉璃光淨  
徧空界薈葡萄花開霏妙香後室聯曰嵐影交牕翠  
松陰入座濃亭額曰山意足皆

御書其西四里登山爲碧霞元君廟前殿外簷恭懸

聖祖御書額曰敷錫廣生殿內恭懸

皇上御書額曰神霄朗照後殿額曰慈護香巖

玉皇閣額曰泰鈞普育精舍額曰寫霧軒皆

御書玉皇閣前恭勒

聖祖御製碑文

增

聖祖御製髻髻山玉皇閣碑 距京師百里有山曰髻  
髻隸懷柔縣兩峯高矗望之如髻故得是名自元明以  
來號爲近畿福地因上有碧霞元君之祠是以每歲孟  
夏四方之民會此祈禱者駢肩疊跡不可勝計古稱積  
高之區神明所舍况茲山北倚紫塞南拱神京岡巒迴  
合蜿蜒磅礴而鍾秀于是則其神氣之感數有靈應理  
固然也康熙五十二年值朕六旬誕期諸臣民就茲山  
瞻禮爲朕祝禧因共建玉皇閣以祈延壽經始於癸巳三

欽定四庫全書  
卷三十一  
月十八日落成於甲午三月十八日而請記其事朕御  
極五十餘年夙夜孜孜唯體

上帝仁愛斯民之心以撫綏天下幸四海清晏年穀順  
成朕與天下臣民得同享太平之福者皆

上帝之眷祐也朕之祇承於

上帝者唯在天下臣民之永安而天下臣民之祝願於  
上帝者唯在朕躬之永年然則茲閣之建卽

上帝之陟降監觀於是乎在矣爰立貞珉載其始末以  
傳永久云

增乾隆十二年

御製髻髻山詩

鳴梢蘭磴迴點筆綺牕虛秀野春雲

合單椒曉景舒水如銀匝匝山是紫芙蕖柳態籠煙際  
桃姿過雨餘暫來欣攬結欲去更躊躇綠字前秋詠還  
如昨日書

增乾隆十八年

御製題髻髻山碧霞觀詩

四面山圍畫屏幃中天路

豁界玻瓈靈峯光幻同金馬神澤依稀擬玉雞夢雨初  
晴嵐翠濕小春猶暖櫛銀低平生懶問長生術羽客休



誇躡景梯

臣等謹按髻髻山並碧霞觀

御製詩俱恭載首見之篇餘不備錄

欽定日下舊聞考卷一百三十九



